

欽定元史

卷之十  
八五六

元史卷六十五

明翰林學士亞中大夫知制誥兼修國史宋濂等修

河渠志第十七

河渠二

黃河

黃河之水其源遠而高其流大而疾其爲患於中國者莫甚焉前史載河決之患詳矣世祖至元九年七月衛輝路新鄉縣廣盈倉南河北岸決五十餘步八月又崩一百八十三步其勢未已去倉止三十步於是委都水監丞馬良弼與本路官同詣相視差丁夫併力修完之

二十五年汴梁路陽武縣諸處河決二十二所漂蕩麥  
禾房舍委宣慰司督本路差夫脩治成宗大德三年五  
月河南省言河決蒲口兒等處浸歸德府數郡百姓被  
災差官脩築計料合脩七隄二十五處共長三萬九千  
九十二步總用葦四十萬四千束徑尺椿二萬四千七  
百二十株役夫七千九百二人武宗至大三年十一月  
河北河南道廉訪司言黃河決溢千里蒙害浸城郭漂  
室廬壞禾稼百姓已罹其毒然後訪求脩治之方而且  
衆議紛紜互陳利害當事者疑惑不決必須上請朝省  
比至議定其害滋大所謂不預已然之弊大抵黃河伏

槽之時水勢似緩觀之不足爲害一遇霖潦湍浪迅猛自孟津以東土性疏薄兼帶沙滷又失導洩之方崩潰決溢可翹足而待近歲亳潁之民幸河北徙有司不能遠慮失於規畫使陂灤悉爲陸地東至杞縣三汉口播河爲三分殺其勢蓋亦有年往歲歸德大康建言相次湮塞南北二汭遂使三河之水合而爲一下流旣不通暢自然上溢爲災由是觀之是自奪分泄之利故其上下決溢至今莫除卽今水勢趨下有復鉅野梁山之意蓋河性遷徙無常苟不爲遠計預防不出數年曹濮濟鄆蒙害必矣今之所謂治水者徒爾議論紛紜咸無良

策水監之官既非精選知河之利害者百無一二雖每  
年累驛而至名爲巡河徒應故事問地形之高下則懵  
不知訪水勢之利病則非所習既無實才又不經練乃  
或妄興事端勞民動衆阻逆水性翻爲後患爲今之計  
莫若於汴梁置都水分監妙選廉幹深知水利之人專  
職其任量存員數類爲巡視謹其防護可疏者疏之可  
堙者堙之可防者防之職掌既專則事功可立較之河  
已決溢民已被害然後鹵莽脩治以勞民者烏可同日  
而語哉於是省令都水監議檢照大德十年正月省臣  
奏準昨都水監陞正三品添官二員鑄分監印巡視御

河脩缺潰疏淺澀禁民船越次亂行者今擬就令分巡  
提點脩治本監議黃河泛漲止是一事難與會通河有  
壩牐漕運分監守治爲比先爲御河添官降印兼提點  
黃河若使專一分監在彼則有妨御河公事况黃河已  
有拘該有司正官提調自今莫若分監官吏以十月往  
與各處官司巡視缺破會計工物督治比年終完來春  
分監新官至則一一交割然後代還庶不相誤工部照  
大德九年黃河決徙逼近汴梁幾至浸没本處官司權  
宜開闢董盆口分入巴河以殺其勢遂使正河水緩併  
趨支流緣巴河舊隘不足吞伏明年急遣蕭都水等閉

塞而其勢愈大卒無成功致連年爲害南至歸德諸處北至濟寧地分至今不息本部議黃河爲害難同餘水欲爲經遠之計非用通知古今水利之人專任其事終無補益河南憲司所言詳悉今都水監別無他見止依舊例議擬未當如量設官精選廉幹奉公深知地形水勢者專任河防之職往來巡視以時疏塞庶可除害省準令都水分監官專治河患任滿交代仁宗延祐元年八月河南等處行中書省言黃河涸露舊水泊汙池多爲勢家所據忽遇泛溢水無所歸遂致爲害由此觀之非河犯人人自犯之擬差知水利都水監官與行省廉

訪司同相視可以疏闢隄障比至泛溢先加脩治用力少而成功多又汴梁路睢州諸處決破河口數十內開封縣小黃村計會月隄一道都水分監脩築障水隄隙所擬不一宜委請行省官與本道憲司汴梁路都水分監官及州縣正官親歷按驗從長講議由是委太常丞郭奉政前都水監丞邊承務都水監卿朶兒只河南行省石右丞本道廉訪副使站木赤汴梁判官張承直上自河陰下至陳州與拘該州縣官一同沿河相視開封縣小黃村河口測量比舊淺減六尺陳留通許太康舊有蒲葦之地後因閉塞西河塔河諸水口以便種蒔故



他處連年潰決各官公議治水之道惟當順其性之自然嘗聞大河自陽武胙城由白馬河間東北入海歷年既久遷徙不常每歲泛溢兩岸時有衝決強爲閉塞正及農忙科椿梢發丁夫動至數萬所費不可勝紀其弊多端郡縣嗷嗷民不聊生蓋黃河善遷徙惟宜順下疏泄今相視上自河陰下抵歸德經夏水漲甚於常年以小黃口分洩之故並無衝決此其明驗也詳視陳州最爲低窪瀕河之地今歲麥禾不收民饑特甚欲爲拯救奈下流無可疏之處若將小黃村河口閉塞必移患隣郡決上流南岸則汴梁被害決下流北岸則山東可憂

事難兩全當遺小就大如免陳村差稅賑其饑民陳留  
通許太康縣被災之家依例取勘賑恤其小黃村河口  
乃舊通流外據脩築月隄并障水隄閉河口別難擬議  
於是凡汴梁所轄州縣河隄或已脩治及當疏通與補  
築者條列具備至五年正月河北河南道廉訪副使奧  
屯言近年河決杞縣小黃村口滔滔南流莫能禦遏陳  
潁潁河膏腴之地浸没百姓流散今水迫汴城遠無數  
里儻值霖雨水溢倉卒何以防禦方今農隙宜爲講究  
使水歸故道達于江淮不惟陳潁之民得遂其生竊恐  
將來浸灌汴城其害匪輕於是大司農司下都水監移

文汴梁分監脩治自六年二月十一日興工至三月九日工畢總計北至槐疙疸兩舊隄南至窰務汴隄通長二十里二百四十三步砌脩護城隄一道長七千四百四十三步下地脩隄下廣十六步上廣四步高一丈六十尺爲一工隄東二十步外取土內河溝七處深淺高下濶狹不一計工二十五萬三千六百八十用夫八千四百五十三除風雨妨工三十日畢內流水河溝南北濶二十步水深五尺河內脩隄底濶二十四步上廣八步高一丈五尺積十二萬尺取土稍遠四十尺爲一工計三萬工用夫百人每步用大椿二計四十各長一丈

二尺徑四寸每步雜草千束計二萬每步簽樁四計八十各長八尺徑三寸水手二十木匠二大船二艘梯鏤一副繩索畢備七年七月汴梁路言滎澤縣六月十一日河決塔海莊東隄十步餘橫隄兩重又缺數處二十三日夜開封縣蘇村及七里寺復決二處本省平章站馬赤親率本路及都水監官併工脩築於至治元年正月興工脩隄岸四十六處該役一百二十五萬六千四百九十四工凡用夫三萬一千四百一十三人文宗至順元年六月曹州濟陰縣河防官本縣尹郝承務言六月五日魏家道口黃河舊隄將決不可脩築以此差募

民夫勦脩護水月隄東西長三百九步下濶六步高一丈又緣水勢瀚漫復於近北築月隄東西長一千餘步下廣九步其功未竟至二十一日水忽泛溢新舊三隄一時咸決明日外隄復壞急率民閉塞而湍流迅猛有蛇時出沒於中所下椿土一掃無遺又舊隄歲久多有缺壞差夫併工築成二十餘步其魏家道口缺隄東西五百餘步深二丈餘外隄缺口東西長四百餘步又磨子口護水隄低薄不足禦水東西長一千五百步魏家道口卒未易脩先差夫補築磨子口七月十六日興工二十八日工畢二十二日按視至朱從馬頭西舊隄缺

壞東西長一百七十餘步計料隄外貼築五步增高一丈二尺與舊隄等上廣二步於磨子口脩隄夫內摘差三百一十人於是月二十三日入役至閏七月四日工畢郝承務又言魏家道口埽堦等村缺破隄堰累下椿土衝洗不存若復閉築緣缺隄周回皆泥淖人不可居兼無取土之處又沛郡安樂等保去歲旱災今復水澇漂禾稼壞室廬民皆缺食難於差倩其不經水害村保民人先已遍差補築黃家橋磨子口諸處隄堰似難重役如候秋涼水退倩夫脩理庶蘇民力今衝破新舊隄七處共長一萬二千二百二十八步下廣十二步上廣

四步高一丈二尺計用夫六千三百四人椿九百九十  
葦箔一千三百二十草一萬六千五束六十尺爲一工  
無風雨妨工度五十日可畢本縣準言至八月三十日  
差夫二千四百二十關請郝承務督役郝承務又言九  
月三日興工脩築至十八日大風十九日雨二十四日  
復雨緣此辛馬頭孫家道口障水隄隄又壞計工役倍  
於元數移文本縣添差二千人同築二十六日元與武  
成定陶二縣分築魏家道口八百二十步脩完十月二  
日至辛馬頭孫家道口從實又量元缺隄南北濶一百  
四十步內水地五十步深者至二丈淺者不下八九尺

依元料用椿箔補築至七日完又於本處剏築月隄一道西北東南斜長一千六百二十七步內武成定陶分築一百五十步實築一千四百七十七步外有元料塼頭魏家道口外隄未築卽欲興工緣冬寒土凍擬候來春併工脩理官民兩便

### 濟州河

濟州河者新開以通漕運也世祖至元十七年七月耿叅政阿里尚書奏爲姚演言開河事令阿合馬與耆舊臣集議以鈔萬錠爲傭直仍給糧食世祖從之十八年九月中書丞相火魯火孫等奏姚總管等言請免益都



淄萊寧海三州一歲賦入折備直以爲開河之用平章阿合馬與諸老臣議以爲一歲民賦雖多較之官給備直行之甚便遂從之十月火魯火孫等奏阿八失所開河經濟州而其地又有一河傍有民田開之甚便臣等議若開此河阿八失所管一方屯田宜移之他處不阻水勢世祖令移之十二月差奧魯赤劉都水及精算數者一人給宣差印往濟州定開河夫役令大名衛州新附軍亦往助工三十一年御史臺言膠萊海道淺澀不能行舟臺官玉速帖木兒奏阿八失所開河省遣牙亦速失來謂漕船泛河則失少泛海則損多旣而漕臣囊

加解萬戶孫偉又言漕海舟疾且便右丞麥朮丁又奏  
幹奴兀奴解凡三移文言阿八失所開河益少損多不  
便轉漕水手軍人二萬舟千艘見閑不用如得之可歲  
漕百萬石昨奉旨候忙古解來共議海道便則阿八失  
河可廢今忙古解已自海道運糧回有一二南人自願  
運糧萬石已許之囊加解孫萬戶復請用軍驗試海運  
省院官暨衆議阿八失河所用水手五千軍五千船千  
艘昇揚州省教習漕運今擬以此水手軍人就用平灤  
船從利津海漕運世祖從之阿八失所開河遂廢

### 滄河

滏河者引滏水以通洛州城濠者也至元五年十月洛  
磁路言洛州城中井泉鹹苦居民食用多作疾且死者  
衆請疏滌舊渠置壩牐引滏水分灌洛州城濠以濟民  
用計會河渠東西長九百步濶六尺深三尺二尺爲工  
役工四百七十五民自備用器歲二次放牐且不妨漕  
事中書省準其言

### 廣濟渠

廣濟渠在懷孟路引沁水以達于河世祖中統二年提  
舉王允中大使楊端仁奉詔開河渠凡募夫千六百五  
十一人內有相合爲夫者通計使水之家六千七百餘

戶一百三十餘日工畢所脩石隄長一百餘步濶三十餘步高一丈三尺石斗門橋高二丈長十步濶六步渠四道長濶不一計六百七十七里經濟源河內河陽溫武陟五縣村坊計四百六十三處渠成甚益於民名曰廣濟三年八月中書省臣忽魯不花等奏廣濟渠司言沁水渠成今已驗工分水恐久遠權豪侵奪乃下詔依本司所定水分已後諸人毋得侵奪至文宗天曆三年三月懷慶路同知阿合馬言天久亢旱夏麥枯槁秋穀種不入土民匱於食近因訪問耆老咸稱舟水澆漑近山田土居民深得其利有沁水亦可溉田中統間王學

士亦爲天旱奉詔開此渠募自願人戶於太行山下沁口古蹟置分水渠口開濬大河四道歷溫陟入黃河約五百餘里渠成名曰廣濟設官提調遇旱則官爲斟酌驗工多寡分水澆漑濟源河內河陽溫武陟五縣民田三千餘頃咸受其賜二十餘年後因豪家截河起堰立碾磨壅遏水勢又經霖雨渠口淤塞隄隤頽圯河渠司尋亦革罷有司不爲整治因致廢壞今五十餘年分水渠口及舊渠蹟俱有可考若蒙依前浚治引水漑田於民大便可令河陽河內濟源溫武陟五縣使水人戶自備工力疏通分水渠口立牐起隄仍委諳知水利之人

多方區畫遇旱視水緩急撤牐通流驗工分水以灌溉  
若霖雨泛漲閉牐退還正流禁治不得截水置碾磨栽  
種稻田如此則澇旱有備民樂趨利請移文孟州河內  
武陟縣委官講議尋據孟州等處申親詣沁口諮詢耆  
老言舊日沁水正河內築土隄遮水入廣濟渠岸北雖  
有減水河道不能吞伏後值霖雨蕩沒田禾以此堵閉  
今若枋口上連土岸及於浸水正河置立石隄與枋口  
相平如遇水溢閉塞牐口使水漫流石隄復還本河又  
從減水河分殺其勢如此庶不爲害約會河陽武陟縣  
尹與耆老等議若將舊廣濟渠依前開濬減水河亦增

開深濶禁安磨碾設立牐堰自下使水遇旱放牐澆田  
值澇閉牐退水公私便益懷慶路備申工部牒都水監  
回文本路委官相視施行

### 三白渠

京兆舊有三白渠自元伐金以來渠堰缺壞土地荒蕪  
陝西之人雖欲種蒔不獲水利賦稅不足軍興乏用太  
宗之十二年梁泰奏請差撥人戶牛具一切種蒔等物  
脩成渠堰比之旱地其收數倍所得糧米可以供軍太  
宗準奏就令梁泰佩元降金牌充宣差規措三白渠使  
郭時中副之直隸朝廷置司於雲陽縣所用種田戶及

牛畜別降旨付塔海紺不於軍前應副是月敕諭塔海紺不近梁泰奏脩三白渠事可於汝軍前所獲有妻少壯新民量撥二千戶及木工二十人官牛內選肥腩齒小者一千頭內乳牛三百以畀梁泰等如不敷於各千戶百戶內貼補限今歲十一月內交付數足趁十二月入工其耕種之人所收之米正爲接濟軍糧如發遣人戶之時或闕少衣裝於各千戶百戶內約量支給差軍護送出境沿途經過之處亦爲防送毋致在逃走逸驗路程給以行糧大口一升小者半之

洪口渠



洪口渠在奉元路英宗至治元年十月陝西屯田府言自秦漢至唐宋年例八月差使水戶自涇陽縣西仲山下截河築洪堰改涇水入白渠下至涇陽縣北白公斗分爲三限并平石限蓋五縣分水之要所北限入三原櫟陽雲陽中限入高陵南限入涇陽澆溉官民田七萬餘畝近至大三年陝西行臺御史王承德言涇陽洪口展脩石渠爲萬世之利由是會集奉元路三原涇陽臨潼高陵諸縣洎涇陽渭南櫟陽諸屯官及耆老議如準所言展脩石渠八十五步計四百二十五尺深二丈廣一丈五尺計用石十二萬七千五百尺人日採石積方

一尺工價二兩五錢石工二百丁夫三百金火匠二用火焚水淬日可鑿石五百尺二百五十五日工畢官給其糧食用具丁夫就役使水之家顧匠傭直使水戶均出陝西省議計所用錢糧不及二年之費可謂一勞永逸准所言便都省準委屯田府達魯花赤只里赤督工自延祐元年二月十日發夫匠入役至六月十九日委官言石性堅厚鑿僅一丈水泉湧出近前續展一十七步石積二萬五千五百尺添夫匠百人日鑿六百尺二百四十二日可畢文宗天曆二年三月屯田總管兼管河渠司事郭嘉議言去歲六月三日驟雨涇水泛漲元

脩洪隄及小龍口盡圮水歸涇白渠內水淺爲此計用  
十四萬九千五百十一工役丁夫一千六百度九十三  
日畢於使水戶內差撥每夫就持麻一斤鐵一斤繫圃  
取泥索各一長四十尺草苫一長七尺厚二寸陝西省  
準屯田府照洪口自秦至宋一百二十激經由三限自  
涇陽下至臨潼五縣分流澆溉民田七萬餘頃驗田出  
夫千六百人自八月一日脩隄至十月放水溉田以爲  
年例近因奉元亢旱五載失稔人皆相食流移疫死者  
十七八今差夫又令就出用物實不能辦集竊詳涇陽  
水利雖分三限引水溉田緣三原等縣地理遙遠不能

依時周遍涇陽北近俱在上限并南限中限用水最便  
今次脩隄除見在戶依例差役其逃亡之家合出夫數  
宜令涇陽縣近限水利戶添差一人官日給米一升併  
工脩治省準出鈔八百錠委耀州同知李承事洎本府  
總管郭嘉議及各處正官計工役照時直糶米給散李  
承事督夫修築至十一月十六日畢

### 揚州運河

運河在揚州之北宋時嘗設軍疏滌世祖取宋之後河  
漸壅塞至元末年江淮行省嘗以爲言雖有旨濬治有  
司奉行未見實効仁宗延祐四年十一月兩淮運司言

鹽課甚重運河淺澀無源止仰天雨請加修治明年二  
月中書移文河南省選官洎運司有司官相視會計工  
程費用於是河南行省委都事張奉政及淮東道宣慰  
司官運司官會州縣倉場官徧歷巡視集議河長二千  
三百五十里有司差瀕河有田之家顧倩丁夫開脩一  
千八百六十九里倉場鹽司不妨辦課協濟有司開脩  
四百八十二里運司言近歲課額增多而船竈戶日益  
貧苦宜令有司通行脩治省減官錢省臣奏準諸色戶  
內顧募丁夫萬人日支鹽糧錢二兩計用鈔二萬錠於  
運司鹽課及減駁船錢內支用差官與都水監河南行

省淮東宣慰司官專董其事廉訪司體察樞密院遣官鎮遏乘農隙併工疏治

### 練湖

練湖在鎮江元有江南之後豪勢之家於湖中築隄圍田耕種侵占既廣不足受水遂致泛溢世祖末年叅政暗都刺奏請依宋例委人提調疏治其侵占者驗畝加賦至治三年十二月省臣奏江淞行省言鎮江運河全藉練湖之水爲上源官司漕運供億京師及商賈販載農民來往其舟楫莫不由此宋時專設人夫以時脩濬練湖豬蓄潦水若運河淺阻開放湖水一寸則可添河

水一尺近年淤淺舟楫不通凡有官物差民運遞甚爲不便委官相視疏治運河自鎮江路至呂城壩長百三十一里計役夫萬五百十三人六十日可畢又用三千餘人浚滌練湖九十日可完人日支糧三升中統鈔一兩行省行臺分官監督所用船物今歲預備來春興工合行事宜依江淞行省所擬旣得旨都省移文江淞行省委叅政董中奉率合屬正官親臨督役於是董中奉言所委前都水少監崇明州知州任奉政鎮江路總管毛中議等議練湖運河此非一事宜依假山諸湖農民取泥之法用船千艘船三人用竹篙撈取淤泥日可三

載月計九萬載三月之間通取二十七萬載就用所取泥增築湖岸自鎮江在城程公壩至常州武進縣呂城壩河長百三十一里一百四十六步擬開河面濶五丈底濶三丈深四尺與見有水二尺可積深六尺所役夫於平江鎮江常州江陰州又建康路所轄溧陽州田多上戶內差倩若濬湖開河二役並與卒難辦集宜趨農隙先開運河工畢就濬練湖省準所言與都事王徵事等於泰定元年正月至鎮江丹陽縣洎各監工官沿湖相視上湖沙岡黃土下湖菱根叢雜泥亦堅硬不可筭取又議兩役並興相離三百餘里往來監督供給爲難



願以所督夫一萬三千五百十二人先開運河期四十  
七日畢次濬練湖二十日可完繼有江南行臺侍御史  
及湖西廉訪司副使俱至乃議首事運河備文咨稟遂  
於是月十七日入役二月十八日省臣奏開濬運河練  
湖重役也宜依行省所議仍令便宜從事後各監工官  
言已分運河作三壩依元料深濶丈尺開浚至三月四  
日工畢數內平江崑山嘉定二州實役二十六日常熟  
吳江二州長州吳縣實役二十八日餘皆役三十日已  
於三月七日積水行舟又監脩練湖官言任奉議指劃  
元料增築隄堰及舊有土基共增濶一丈二尺平面至

高底灘脚增築共量斜高二丈五尺依中隄西石礎東  
舊隄臥羊灘脩築如舊隄高濶已及所料之上者遇有  
崩缺脩築令完中隄西石礎至五百婆隄西上增高土  
一尺有缺亦補之五百婆隄至馬林橋隄水勢稍緩不  
須脩治其隄底間有滲漏者窒塞之三月六日破土九  
日入役至十一日工畢實役三日歸勘任少監元料開  
運河夫萬五百十三人六十日畢濬練湖夫三千人九  
十日畢人日支鈔一兩米三升共該鈔萬八千一十四  
錠二十兩米二萬七千二十一石六斗實徵夫萬三千  
五百十二人共役三十三日支鈔八千六百七十九錠

三十六兩糧萬三千十九石五斗八升比附元料省鈔  
九千三百三十四錠三十四兩糧萬四千二石二升其  
練湖未畢相視地形水勢再議叅政董中奉又言練湖  
舊有湖兵四十三人添補五十七名共百人於本路州  
縣苗糧三石之下二石之上差充專任脩築湖岸設提  
領二員壕寨二人司吏三人於有出身人內選用工部  
議練湖所設提領人等印信卽同湖兵宜咨本省通行  
議擬又鎮江路言運河練湖今已開濬若不設法關防  
徒勞民力除關本路達魯花赤兀魯失海牙總治其事  
同知哈散知事程郇專管啟閉斗門行省從之

吳松江

浙西諸山之水受之太湖下爲吳松江東匯澱山湖以入海而潮汐來往逆湧濁沙上涇河口是以宋時設置撩洗軍人專掌脩治元旣平宋軍士罷散有司不以爲務勢豪租占爲蕩爲田州縣不得其人輒行許準以致湮塞不通公私俱失其利久矣至治三年江浙省臣方以爲言就委嘉興路治中高朝列湖州路知事丁將仕同本處正官體究舊曾疏濬通海故道及新生沙漲礙水處所商度開滌圖呈據丁知事等官按視講究合開濬河道五十五處內常熟州九處十三段該工百三十

二萬一千五百六十二崑山州十一處九十五里用工  
二萬七千四日役夫四百五十六宜於本州有田一項  
之上戶內驗田多寡算量里步均派自備糧赴功疏濬  
正月上旬興工限六十日工畢二年一次舉行嘉定州  
三十五處五百三十八里該工百二十六萬七千五十  
九日支糧一升計米萬二千六百七十石九升五斗日  
役夫二萬一千一百一十七六十日畢工程浩大米糧  
數多乞依年例勸率附河有田用水之家自備口糧佃  
戶傭力開濬奈本州連年被災今歲尤甚力有不逮宜  
從上司區處高治中會集松江府各州縣官按視議合

濬河渠華亭縣九處計五百二十八里該工九百六十八萬四千八百八十二役夫十六萬一千四百一十四人日支糧二升計米十九萬三千六百九十七石六斗四升上海縣十四處計四百七十一里該工千二百三十六萬八千五百二十二日役夫二萬六千一百三十四人日支糧二升計二十四萬七千三百六十一石四升六升十日工畢官給之糧傭民疏治如下年豐稔勸率有田之家五十畝出夫一人十畝之上驗數合出止於本保開濬其權勢之家置立魚籬并沙塗栽葦者依上出夫其上海嘉定連年旱澇皆緣河口湮塞旱則無以灌溉

澇則不能流洩累致凶歉官民俱病至元三十年以後  
兩經疏闢稍得豐稔比年又復壅閉勢家愈加租占雖  
得徵賦實失大利上海縣歲收官糧一十七萬石民糧  
三萬餘石畧舉似延祐七年災傷五萬八千七百餘石  
至治元年災傷四萬九千餘石二年十萬七千餘石水  
旱連年殆無虛歲不惟虧欠官糧復有賑貸之費近委  
官相視地形講議疏濬其通海大江未易遽治舊有河  
港聯絡官民田土之間藉以灌溉者今皆填塞必須疏  
通以利耕種欲今有田人戶自爲開濬而工役浩繁民  
力不能獨成由是議上海嘉定河港宜令本處所管軍

民站竈僧道諸色有田者以多寡出夫自備糧脩治州縣正官督役其豪勢租占蕩田妨水利者並與除闢本處民田稅糧全免一年官租減半今秋收成下年農隙舉行行省行臺廉訪司官巡鎮外據華亭崑山常熟州河港比上海嘉定緩急不同難爲一體從各處勸農正官督有田之家備糧併工脩治若遽興工陰陽家言癸亥年動土有忌預爲咨稟可否至泰定元年十月十九日右丞相旭邁傑等奏江瀾省言吳松江等處河道壅塞宜爲疏滌仍立牖以節水勢計用四萬餘人今歲十二月爲始至正月終六十日可畢用二萬餘人二年可



元史卷之六十五 河渠志 二十三  
畢其丁夫於旁郡諸色戶內均差依練湖例給備直糧  
食行省行臺廉訪司并有司官同提調臣等議此事官  
民兩便宜從其請若丁夫有餘止令一年畢命脫歡荅  
刺罕諸臣同提調專委左丞朶兒只班及前都水任少  
監董役得旨移文行省準擬疏治江浙省下各路發夫  
入役至二年閏正月四日工畢

### 澱山湖

太湖爲湖西巨浸上受杭湖諸山之水瀦蓄之餘分匯  
爲澱山湖東流入海世祖末年叅政暗都刺言此湖在  
宋時委官差軍守之湖旁餘地不許侵占常疏其壅塞

以洩水勢今既無人管領遂爲勢豪絕水築隄繞湖爲田湖狹不足瀦蓄每遇霖潦泛溢爲害昨本省官忙古斛等興言疏治因受曹總管金而止張叅議潘應武等相繼建言識者咸以爲便臣等議此事可行無疑然雖軍民相叅選委廉幹官提督行省山住子行院董八都兒子行臺哈刺斛令親詣相視會計合用軍夫擬稟世祖曰利益美事舉行已晚其行之既而平章鐵哥言委官相視計用夫十二萬百日可畢昨奏軍民共役今民丁數多不須調軍世祖曰有損有益咸令均齊毋自疑惑其均科之至元三十一年世祖崩成宗卽位平章鐵

哥奏太湖澱山湖昨嘗奏過先帝差倩民夫二十萬疏掘已畢今諸河日受兩潮漸致沙漲若不依舊宋例令軍屯守必致坐隳成功臣等議常時工役撥軍樞府猶且恡惜屯守河道用軍八千必辭不遣澱山湖圍田賦糧二萬石就以募民夫四千調軍士四千與同屯守立都水防田使司職掌收捕海賊脩治河渠圍田命伯顏察兒暨樞密院議畢聞奏於是樞府言嘗奏澱山湖在宋時設軍屯守范殿帥朱張輩必知其故擬與省官集議定稟奏有旨從之乃集樞府官及范殿帥等兵議朱張言宋時屯守河道用手號軍大處千人小處不下三

四百隸巡檢司管領范殿帥言差夫四千非動搖四十萬戶不可若令五千軍屯守就委萬戶一員提調事或可行臣等亦以爲然與都水巡防萬戶府職名俾隸行院樞府官又言若與知源委之人詢其詳候至都定議從之

### 鹽官州海塘

鹽官州去海岸三十里舊有捍海塘二後又添築鹹塘在宋時亦嘗崩陷成宗大德三年塘岸崩都省委禮部郎中游中順泊本省官相視虛沙復漲難於施力至仁宗延祐己未庚申間海汎失度累壞民居陷地三十餘

里其時省憲官共議宜於州後北門添築土塘然後築石塘東西長四十三里後以潮汐沙漲而止至泰定卽位之四年二月間風潮大作衝捍海小塘壞州郭四里杭州路言與都水庸田司議欲於北地築塘四十餘里而工費浩大莫若先脩鹹塘增其高濶填塞溝港且濬深近北備塘濠塹用椿密釘庶可護禦江潮省準下本路脩治都水庸田司又言宜速差丁夫當水入衝堵閉其不敷工役於仁和錢塘及嘉興附近州縣諸色人戶內斟酌差倩卽目淪沒不已旦夕誠爲可慮工部議海岸崩摧重事也宜移文江浙行省督催庸田使司鹽運

司及有司發丁夫脩治毋致侵犯城郭貽害居民五月五日平章禿滿迭兒茶乃史叅政等奏江浙省四月內潮水衝破鹽官州海岸令庸田司官徵夫脩堵又令僧人誦經復差人令天師致祭臣等集議世祖時海岸嘗崩遣使命天師祈祀潮卽退今可令直省舍人伯顏奉御香令天師依前例祈祀制曰可旣而杭州路又言八月以來秋潮洶湧水勢愈大見築沙地塘岸東西八十餘步造木櫃石圍以塞其要處本省左丞相脫歡等議安置石圍四千九百六十抵禦鏊嚙以救其急擬比瀾江立石塘可爲久遠計工物用鈔七十九萬四千餘錠

糧四萬六千三百餘石接續興脩致和元年三月省臣  
奏江淞省并庸田司官脩築海塘作竹籬條內實以石  
鱗次壘疊以禦潮勢今又淪陷入海見圖脩治儻得堅  
久之策移文具報臣等集議此重事也旦夕駕幸上都  
分官扈從不得圓議今差戶部尚書李家奴工部尚書  
李嘉賓樞密院屬衛指揮青山副使洪灝宣政僉院南  
哥班與行省左丞相脫歡及行臺行宣政院庸田使司  
諸臣會議脩治之方合用軍夫除戍守州縣關津外酌  
量差撥從便添支口糧合役丁力附近有田之民及僧  
道也里可溫荅失蠻等戶內點倩凡工役之時諸人毋

或沮壞違者罪之合行事務提調官移文稟奏施行有旨從之四月二十八日朝廷所委官泊行省臺院及庸田司等官議大德延祐欲建石塘未就泰定四年春潮水異常增築土塘不能抵禦議置板塘以水湧難施工遂作籩篠木櫃間有漂沉欲踵前議壘石塘以圖久遠爲地脉虛浮比定海澗江海鹽地形水勢不同由是造石囤於其壞處壘之以救目前之急已置石囤二十九里餘不曾崩陷畧見成效庸田司與各路官同議東西接壘石囤十里其六十里塘下舊河就取土築塘鑿東山之石以備崩損文宗天曆元年十一月都水庸田司



言八月十日至十九日正當大汛潮勢不高風平水穩  
十四日祈請天妃入廟自本州嶽廟東海北護岸鱗鱗  
相接十五日至十九日海岸沙漲東西長七里餘南北  
廣或三十步或數十百步漸見南北相接西至石圍已  
及五都脩築捍海塘與鹽塘相連直抵巖門障禦石圍  
東至十一都六十里塘東至東大尖山嘉興平湖三路  
所脩處海口自八月一日至二日探海二丈五尺至十  
九日二十日探之先二丈者今一丈五尺先一丈五尺  
者今一丈西自六都仁和縣界赭山雷山爲首添漲沙  
塗已過五都四都鹽官州廊東西二都沙土流行水勢

俱淺二十日復巡視自東至西岸脚漲沙比之八月十七日漸增高濶二十七日至九月四日大汛本州嶽廟東西水勢俱淺漲沙東過錢家橋海岸元下石囤木植並無頽圯水息民安於是改鹽官州曰海寧州

### 龍山河道

龍山河在杭州城外歲久淤塞武宗至大元年江潮省令史裴堅言杭州錢塘江近年以來爲沙塗壅漲潮水遠去離北岸十五里舟楫不能到岸商旅往來募夫搬運十七八里使諸物翔湧生民失所遞運官物甚爲煩擾訪問宋時並江岸有南北古河一道名龍山河今潮

江亭南至龍山牖約一十五里糞壤填塞兩岸居民間有侵占迹其形勢宜改脩運河開掘沙土對牖搬載直抵淞江轉入兩處市河免擔負之勞生民獲惠省下杭州路相視錢塘縣城南上隅龍山河至橫河橋委係舊河居民侵占起建房屋若疏通以接運河公私大便計工十五萬七千五百六十六日役夫五千二百五十二度可三十日畢所役夫於本路錄事司仁和錢塘縣富實之家差倩就持筐檐鋤鑿應役人日支官糧二升該米三千一百五十一石三斗二升河長九里三百六十二步造石橋八立上下二牖計用鈔一百六十三錠二

十三兩四錢七分七釐省準咨請丞相脫脫總治其事  
於仁宗延祐三年三月七日興工至四月十八日工畢

元史卷六十五

元史卷六十六

明翰林學士亞中大夫知制誥兼脩國史宋 濂等修

河渠志第十七下

河渠二

黃河

至正四年夏五月大雨二十餘日黃河暴溢水平地深  
二丈許北決白茅隄六月又北決金隄並河郡邑濟寧  
單州虞城碭山金鄉魚臺豐沛定陶楚丘武城以至曹  
州東明鉅野鄆城嘉祥汶上任城等處皆罹水患民老  
弱昏墊壯者流離四方水勢北侵安山沿入會通運河

延袤濟南河間將壞兩漕司鹽場妨國計甚重省臣以聞朝廷患之遣使體量仍督大臣訪求治河方畧九年冬脫脫旣復爲丞相慨然有志於事功論及河決卽言于帝請躬任其事帝嘉納之乃命集羣臣議廷中而言人人殊唯都漕運使賈魯言必當治先是魯嘗爲山東道奉使宣撫首領官循行被水郡邑具得脩捍成策後又爲都水使者奉旨詣河上相視驗狀爲圖以二策進獻一議脩築北隄以制橫潰其用功省一議疏塞並舉挽河使東行以復故道其功費甚大至是復以二策對脫脫躉其後策議定乃薦魯于帝大稱旨十一年四

月初四日下詔中外命魯以工部尚書爲總治河防使  
進秩二品授以銀印發汴梁大名十有三路民十五萬  
人廬州等戍十有八翼軍二萬人供役一切從事大小  
軍民咸稟節度便宜興繕是月二十二日鳩工七月疏  
鑿成八月決水故河九月舟楫通行十一月水土工畢  
諸埽諸隄成河乃復故道南匯于淮又東入于海帝遣  
貴臣報祭河伯召魯還京師論功超拜榮祿大夫集賢  
大學士其宣力諸臣遷賞有差賜丞相脫脫世襲荅刺  
罕之號特命翰林學士承旨歐陽玄製河平碑文以旌  
勞績玄旣爲河平之碑又自以爲司馬遷班固記河渠



溝洫僅載治水之道不言其方便後世任斯事者無所  
考則乃從魯訪問方畧及詢過客質吏牘作至正河防  
記欲使來世罹河患者按而求之其言曰治河一也有  
疏有濬有塞三者異焉釃河之流因而導之謂之疏去  
河之淤因而深之謂之濬抑河之暴因而扼之謂之塞  
疏濬之別有四曰生地曰故道曰河身曰減水河生地  
有直有紆因直而鑿之可就故道故道有高有卑高者  
平之以趨卑高卑相就則高不壅卑不瀦慮夫壅生潰  
瀦生理也河身者水雖通行身有廣狹狹難受水水溢  
悍故狹者以計闢之廣難爲岸岸善崩故廣者以計禦

之減水河者水放曠則以制其狂水隳突則以殺其怒  
治隄一也有荆築修築補築之名有刺水隄有截河隄  
有護岸隄有縷水隄有石船隄治埽一也有岸埽水埽  
有龍尾欄頭馬頭等埽其爲埽臺及推卷牽制蕪掛之  
法有用土用石用鐵用草用木用杙用絙之方塞河一  
也有缺口有豁口有龍口缺口者已成川豁口者舊常  
爲水所豁水退則口下於隄水漲則溢出於口龍口者  
水之所會自新河入故道之深也此外不能悉書因其  
用功之次第而就述於其下焉其濬故道深廣不等通  
長二百八十里百五十四步而強功始自白茅長百八

十二里繼自黃陵岡至南白茅闢生地十里口初受廣百八十步深二丈有二尺已下停廣百步高下不等相折深二丈及泉曰停曰折者用古算法因此推彼知其勢之低昂相準折面取勻停也南白茅至劉莊村接入故道十里通折墾廣八十步深九尺劉莊至專固百有二里二百八十步通折停廣六十步深五尺專固至黃固墾生地八里面廣百步底廣九十步高下相折深丈有五尺黃固至哈只口長五十一里八十步相折停廣墾六十步深五尺乃濬凹里減水河通長九十八里百五十四步凹里村缺河口生地長三里四十步面廣六

十步底廣四十步深一丈四尺自凹里生地以下舊河  
身至張贊店長八十二里五十四步上三十六里墾廣  
二十步深五尺中三十五里墾廣二十八步深五尺下  
十里二百四十步墾廣二十六步深五尺張贊店至楊  
青村接入故道墾生地十有三里六十步面廣六十步  
底廣四十步深一丈四尺其塞專固缺口脩隄三重并  
補築凹里減水河南岸豁口通長二十里三百十有七  
步其翔築河口前第一重西隄南北長三百三十步面  
廣二十五步底廣三十三步樹置椿樑實以土牛草葦  
雜稍相兼高丈有三尺隄前置龍尾大埽言龍尾者伐

大樹連稍繫之隄旁隨水上下以破嚙岸浪者也築第  
二重正隄并補兩端舊隄通長十有一里三百步缺口  
正隄長四里兩隄相接舊隄置椿堵閉河身長百四十  
五步用土牛草葦稍土相兼脩築底廣三十步脩高二  
丈其岸上土工脩築者長三里二百十有五步有奇高  
廣不等通高一丈五尺補築舊隄者長七里三百步表  
裏倍薄七步增卑六尺計高一丈築第三重東後隄并  
接脩舊隄高廣不等通長八里補築凹里減水河南岸  
豁口四處置椿木草土相兼長四十七步於是塞黃陵  
全河水中及岸上脩隄長三十六里百三十六步其脩

大隄刺水者二長十有四里七十步其西復作大隄刺水者一長十有二里百三十步內朔築岸上土隄西北起李八宅西隄東南至舊河岸長十里百五十步顛廣四步趾廣三之高丈有五尺仍築舊河岸至入水隄長四百三十步趾廣三十步顛殺其六之一接脩入水兩岸埽隄並行作西埽者夏人水工徵自靈武作東埽者漢人水工徵自近畿其法以竹絡實以小石每埽不等以蒲葦綿腰索徑寸許者從鋪廣可一二十步長可二三十步又以曳埽索絢徑三寸或四寸長二百餘尺者衡鋪之相間復以竹葦麻糝大絳長三百尺者爲管心

索就繫綿腰索之端於其上以草數千束多至萬餘勺布厚鋪於綿腰索之上橐而納之丁夫數千以足踏實推卷稍高卽以水工二人立其上而號於衆衆聲力舉用小大推梯推卷成埽高下長短不等大者高二丈小者不下丈餘又用大索或互爲腰索轉致河濱選健丁操管心索順埽臺立踏或掛之臺中鐵猫大概之上以漸縱之下水埽後掘地爲渠陷管心索渠中以散草厚覆築之以土其上復以土牛雜草小埽稍土多寡厚薄先後隨宜修疊爲埽臺務使牽制上下縝密堅壯互爲掎角埽不動搖日力不足火以繼之積累旣畢復施前

法卷埽以厭先下之埽量水淺深制埽厚薄疊之多至四埽而止兩埽之間置竹絡高二丈或三丈圍四丈五尺實以小石土牛旣滿繫以竹纜其兩旁並埽密下大椿就以竹絡上大竹腰索繫於椿上東西兩埽及其中竹絡之上以草土等物築爲埽臺約長五十步或百步再下埽卽以竹索或麻索長八百尺或五百尺者一二雜廁其餘管心索之間俟埽入水之後其餘管心索如前蕕掛隨以管心長索遠置五七十步之外或鐵猫或大椿曳而繫之通管束累日所下之埽再以草土等物通脩成隄又以龍尾大埽密掛於護隄大椿分析水勢



其隄長二百七十步北廣四十二步中廣五十五步南  
廣四十二步自顛至趾通高三丈八尺其截河大隄高  
廣不等長十有九里百七十七步其在黃陵北岸者長  
十里四十一步築岸上土隄西北起東西故隄東南至  
河口長七里九十七步顛廣六步趾倍之而強二步高  
丈有五尺接脩入水施土牛小埽稍草雜土多少厚薄  
隨宜脩疊及下竹絡安大椿繫龍尾埽如前兩隄法唯  
脩疊埽臺增用白闌小石并埽上及前游脩埽隄一長  
百餘步直抵龍口稍北欄頭三埽並行埽大隄廣與刺  
水二隄不同通前列四埽間以竹絡成一大隄長二百

八十步北廣百一十步其顛至水面高丈有五尺水面至澤腹高二丈五尺通高三丈五尺中流廣八十步其顛至水面高丈有五尺水面至澤腹高五丈五尺通高七丈並翔築縷水橫隄一東起北截河大隄西抵西刺水大隄又一隄東起中刺水大隄西抵西刺水大隄通長二里四十二步亦顛廣四步趾三之高丈有二尺脩黃陵南岸長九里百六十步內翔岸土隄東北起新補白茅故隄西南至舊河口高廣不等長八里二百五十步乃入水作石船大隄蓋由是秋八月二十九日乙巳道故河流先所脩北岸西中刺水及截河三隄猶短約

水尚少力未足恃決河勢大南北廣四百餘步中流深  
三丈餘益以秋漲水多故河十之八兩河爭流近故河  
口水刷岸北行洄漩湍激難以下埽且埽行或遲恐水  
盡湧入決河因淤故河前功遂隳魯乃精思障水入故  
河之方以九月七日癸丑逾流排大船二十七艘前後  
連以大桅或長椿用大麻索竹緹絞縛綴爲方舟又用  
大麻索竹緹用船身繳繞上下令牢不可破乃以鐵猫  
於上流碓之水中又以竹緹絕長七八百尺者繫兩岸  
大樑上每緹或碓二舟或三舟使不得下船腹畧鋪散  
草滿貯小石以合子板釘合之復以埽密布合子板上

或二重或三重以大麻索縛之急復縛橫木三道於頭  
桅皆以索維之用竹編笆夾以草石立之桅前約長丈  
餘名曰水簾桅復以木檣拄使簾不偃仆然後選水工  
便捷者每船各二人執斧鑿立船首尾岸上搥鼓爲號  
鼓鳴一時齊鑿須臾舟穴水入舟沉遏決河水怒溢故  
河水暴增卽重樹水簾令後復布小埽土牛白闌長稍  
雜以草土等物隨以填堦以繼之石船下詣實地出水  
基趾漸高復卷大埽以壓之前船勢畧定尋用前法沉  
餘船以竟後功昏曉百刻役夫分番甚勞無少間斷船  
隄之後草埽三道並舉中置竹絡盛石並埽置椿繫纜

四埽及絡一如脩北截水隄之法第以中流水深數丈  
用物之多施工之大數倍他隄船隄距北岸纔四五十  
步勢迫東河流峻若自天降深淺叵測於是先卷下大  
埽約高二丈者或四或五始出水面脩至河口一二十  
步用工尤艱薄龍口喧逐猛疾勢撼埽基陷裂欹傾俄  
遠故所觀者股弁衆議騰沸以爲難合然勢不容已曾  
神色不動機解捷出進官吏工徒十餘萬人日加獎諭  
辭旨懇至衆皆感激赴功十一月十一日丁巳龍口遂  
合決河絕流故道復通又於隄前通卷欄頭埽各一道  
多者或三或四前埽出水管心大索繫前埽礎後關頭

埽之後後埽管心大索亦繫小埽種前關頭埽之前後先羈縻以鋼其勢又於所交索上及兩埽之間壓以小石白關土牛草土相半厚薄多寡相勢措置埽隄之後自南岸復脩一隄抵已閉之龍口長二百七十步船隄四道成隄用農家場圃之具曰轆軸者穴石立木如比櫛蕤前埽之旁每步置一轆軸以橫木貫其後又穴石以徑二寸餘麻索貫之繫橫木上密掛龍尾大埽使夏秋潦水冬春凌簿不得肆力於岸此隄接北岸截河大隄長二百七十步南廣百二十步顛至水面高丈有七尺水面至澤腹高四丈二尺中流廣八十步顛至水面

高丈有五尺水面至澤腹高五丈五尺通高七丈仍治南岸護隄埽一道通長百三十步南岸護岸馬頭埽三道通長九十五步脩築北岸隄防高廣不等通長二百五十四里七十一歩白茅河口至板城補築舊隄長二十五里二百八十五歩曹州板城至英賢村等處高廣不等長一百三十三里二百歩稍岡至碭山縣增培舊隄長八十五里二十歩歸德府哈只口至徐州路三百餘里脩完缺口一百七處高廣不等積脩計三里二百五十六歩亦思刺店縷水月隄高廣不等長六里三十歩其用物之凡椿木大者二萬七千榆柳雜稍六十六

萬六千帶稍連根株者三千六百藁秸蒲葦雜草以束計者七百三十三萬五千有奇竹竿六十二萬五千葦席十有七萬二千小石二千艘繩索小大不等五萬七千所沉大船百有二十鐵纜三十有二鐵猫三百三十有四竹篾以斤計者十有五萬礮石三千塊鐵鑽萬四千二百有奇大釘三萬三千二百三十有二其餘若木龍鬣椽木麥秸扶椿鐵叉鐵吊枝麻搭火鈎汲水貯水等具皆有成數官吏俸給軍民衣糧工錢醫藥祭祀賑恤驛置馬乘及運竹木沉船渡船下椿等工鐵石竹木繩索等匠傭貲兼以和買民地爲河併應用雜物等價



通計中統鈔百八十四萬五千六百三十六錠有奇魯嘗有言水工之功視土工之功爲難中流之功視河濱之功爲難決河口視中流又難北岸之功視南岸爲難用物之效草雖至柔柔能狎水水漬之生泥泥與草并力重如碇然維持夾輔纜索之功實多蓋由魯習知河事故其功之所就如此玄之言曰是役也朝廷不惜重費不吝高爵爲民辟害脫脫能體上意不憚焦勞不恤浮議爲國拯民魯能竭其心思智計之巧乘其精神膽氣之壯不惜劬瘁不畏譏評以報君相知人之明宜悉書之使職史氏者有所考證也先是歲庚寅河南北童

謠云石人一隻眼挑動黃河天下反及魯治河果於黃陵岡得石人一眼而汝潁之妖寇乘時而起議者往往以謂天下之亂皆由賈魯治河之役勞民動衆之所致殊不知元之所以亡者實基於上下因循狃於宴安之習紀綱廢弛風俗偷薄其致亂之階非一朝一夕之故所由來久矣不此之察乃獨歸咎於是役是徒以成敗論事非通論也設使賈魯不興是役天下之亂詎無從而起乎今故具錄玄所記庶來者得以詳焉

### 蜀堰

江水出蜀西南徼外東至于岷山而禹導之秦昭王時

蜀太守李冰鑿離堆分其江以灌川蜀民用以饒歷千數百年所過衝薄蕩囓又大爲民患有司以故事歲治隄防凡一百三十有三所役兵民多者萬餘人少者千人其下猶數百人役凡七十日不及七十日雖事治不得休息不役者日出三緡爲庸錢由是富者屈於貲貧者屈於力上下交病會其費歲不下七萬緡大抵出於民者十九藏于吏而利之所及不足以償其費矣元統二年僉四川肅政廉訪司事吉當普巡行周視得要害之處三十有二餘悉罷之召灌州判官張弘計曰若甃之以石則歲役可罷民力可蘇矣弘曰公慮及此生民

之福國家之幸萬世之利也弘遂出私錢試爲小堰堰成水暴漲而堰不動乃具文書會行省及蒙古軍七翼之長郡縣守宰下及鄉里之老各陳利害咸以爲便復禱于冰祠卜之吉於是徵工發徒以仍改至元元年十有一月朔日肇事于都江堰卽禹鑿之處分水之源也鹽井關限其西北水西關據其西南江南北皆東行北舊無江冰鑿以辟沫水之害中爲都江堰少東爲大小釣魚又東跨二江爲石門以節北江之水又東爲利民臺臺之東南爲侍郎楊柳二堰其水自離堆分流入于南江南江東至鹿角又東至金馬口又東道大安橋入

于成都俗稱大皂江江之正源也北江少東爲虎頭山  
爲鬪雞臺臺有水則以尺畫之凡十有一水及其九其  
民喜過則憂沒其則則困又書深淘灘高作堰六字其  
旁爲治水之法皆冰所爲也又東爲離堆又東過凌虛  
步雲二橋又東至三石洞醴爲二渠其一自上馬騎東  
流過郫入于成都古謂之外江此冰所穿二江也南江  
自利民臺有支流東南出萬工堰又東爲駱駝又東爲  
碓口繞青城而東鹿角之北涯有渠曰馬壩東流至成  
都入于南江渠東行二十餘里水決其南涯四十有九  
每歲疲民力以塞之乃自其北涯鑿二渠與楊柳渠合

東行數十里復與馬瀾渠會而渠成安流自金馬口之西鑿二渠合金馬渠東南入于新津江罷藍淀黃水于金白水新興至三利十二堰北江三石洞之東爲外應顏上五斗諸堰外應顏上之水皆東北流入于外江五斗之水南入馬瀾渠皆內江之支流也外江東至崇寧亦爲萬工堰堰之支流自北而東爲三十六洞過清白堰東入于彭漢之間而清白堰水潰其南涯延袤三里餘有司因潰以爲堰堰輒壞乃疏其北涯舊渠直流而東罷其堰及三十六洞之役嘉定之青神有堰曰鴻化則授成其長吏應期而功畢若成都之九里隄崇寧之

萬工堰彰之壩口豐潤千江石洞濟民羅脚諸堰工未  
及施則召長吏勉諭使及農隙爲之諸堰都江及利民  
臺之役最大侍郎楊林外應顏上五斗次之鹿角萬工  
駱馳碓口三利又次之而都江又居大江中流故以鐵  
萬六千斤鑄爲大龜貫以鐵柱而鎮其源然後卽工諸  
堰皆甃以石範鐵以關其中取桐實之油和石灰雜麻  
絲而搗之使熟以苴罅漏岸善崩者密築江石以護之  
上植楊柳旁種蔓荆櫛比鱗次賴以爲固蓋以數百萬  
計所至或疏舊渠以導其流或鑿新渠以殺其勢遇水  
之會則爲石門以時啟閉而洩蓄之用以節民力而資

民利凡智力所及無不爲也初郡縣及兵家共掌都江之政延祐七年其兵官奏請獨任郡縣民不堪其役至是復合焉常歲獲水之利僅數月堰輒壞至是雖緣渠所置碓磴紡績之處以千萬計四時流轉而無窮其始至都江水深廣莫可測忽有大洲湧出其西南方可數里人得用事其間入山伐石崩石已滿隨取而足蜀故多雨自初役至工畢無雨雪故力省而功倍若有相之者五越月功告成而吉當普以監察御史召省臺上其功詔揭揆斯製文立碑以旌之是役也凡石工金工皆七百人木工二百五十人役徒三千九百人而蒙古軍



居其二千糧爲石千有奇石之材取于山者百萬有奇石之灰以斤計者六萬有奇油半之鐵六萬五千斤麻五千斤最其工之直物之價以緡計者四萬九千有奇皆出於民之庸而在官之積者尚餘二十萬一千八百緡責灌守以貸于民歲取其息以備祭祀及淘灘脩堰之費仍蠲灌之兵民所常徭役俾專其力於堰事

### 涇渠

涇渠者在秦時韓使水工鄭國說秦鑿涇水自仲山西抵瓠口爲渠並北山東注于洛三百餘里以溉田蓋欲以罷秦之力使無東伐秦覺其謀欲殺之鄭曰臣爲韓

延數年之命而爲秦建萬世之利秦以爲然使迄成之  
號鄭渠漢時有白公者奏穿渠引涇水起谷口入櫟陽  
注渭中袤二百里溉田四千五百餘頃因名曰白渠歷  
代因之皆享其利至宋時水衝齧失其故蹟熙寧間詔  
賜常平息錢助民興作自仲山旁開鑿石渠從高瀉水  
名豐利渠元至元間立屯田府督治之大統八年涇水  
暴漲毀堰塞渠陝西行省命屯田府總管夾谷伯顏帖  
木兒及涇陽尹王琚疏導之起涇陽高陵三原櫟陽用  
水人戶及渭南櫟陽涇陽三屯所人夫共三千餘人興  
作水通流如舊其制編荆爲圍貯之以石復填以草以

土爲堰歲時葺理未嘗廢止至大元年王琚爲西臺御史建言於豐利渠上更開石渠五十一丈濶一丈深五尺積一十五萬三千工每方一尺爲一工自延祐元年興工至五年渠成是年秋改堰至新口泰定間言者謂石渠歲久水流漸穿逾下去岸益高至正三年御史宋秉亮相視其堰謂渠積年坎取淤土疊壘於岸極爲高崇力難送土於上因請就岸高處開通鹿巷以便夫行廷議允可四年屯田同知牙八胡涇尹李克忠發丁夫開鹿巷八十四處削平土壘四百五十餘步二十年陝西行省左丞相帖里帖木兒遣都事楊欽脩治凡溉農

田四萬五千餘頃

金口河

至正二年正月，中書參議李羅帖木兒都水傅佐建言：起自通州南高麗莊，直至西山石峽，鐵板開水，古金口一百二十餘里，剗開新河一道，深五丈，廣二十丈，放西山金口水東流，至高麗莊，合御河，接引海運至大都城內，輸納是時，脫脫爲中書右丞相，以其言奏而行之。廷臣多言其不可，而左丞許有壬言尤力。脫脫排羣議，不納。務於必行。有壬因條陳其利害，畧曰：大德二年，渾河水發，爲民害。大都路都水監將金口下閉閘板，五年間

渾河水勢浩大郭太史恐衝沒田薛二村南北二城又將金口已上河身用砂石雜土盡行堵閉至順元年因行都水監郭道壽言金口引水過京城至通州其利無窮工部官并河道提舉司大都路及合屬官員耆老等相視議擬水由二城中間窒礙又盧溝河自橋至合流處自來未嘗有漁舟上下此乃不可行船之明驗也且通州去京城四十里盧溝止二十里此時若可行船當時何不於盧溝立馬頭百事近便却於四十里外通州爲之又西山水勢高峻亡金時在都城之北流入郊野縱有衝決爲害亦輕今則在都城西南與昔不同此水

性本湍急若加以夏秋霖潦漲溢則不敢必其無虞宗廟社稷之所在豈容僥倖於萬一若一時成功亦不能保其永無衝決之患且亡金時此河未必通行今所有河道遺跡安知非作而復輟之地乎又地形高下不同若不作閘必致走水淺澁若作閘以節之則沙泥渾濁必致淤塞每年每月專人挑洗蓋無窮盡之時也且郭太史初作通惠河時何不用此水而遠取白浮之水引入都城以供閘埧之用蓋白浮之水澄清而此水渾濁不可用也此議方輿傳聞於外萬口一辭以爲不可若以爲成大功者不謀於衆人言不足聽則是商鞅王安

石之法當今不宜有此議既上丞相終不從遂以正月  
興工至四月功畢起閘放水口水流湍勢急沙泥壅塞  
船不可行而開挑之際毀民廬舍墳塋夫丁死傷甚衆  
又費用不貲卒以無功繼而御史糾劾建言者李羅帖  
木兒傳佐俱伏誅今附載其事于此用爲妄言水利者  
之戒

元史卷六十七

明翰林學士亞中大夫知制誥兼修國史宋 濂等修

禮樂志第十八

禮樂一

傳曰禮者天地之序也樂者天地之和也致禮以治躬  
外貌斯須不莊不敬則慢易之心入之矣致樂以治心  
中心斯須不和不樂則鄙詐之心入之矣古之禮樂壹  
本於人君之身心故其爲用足以植綱常而厚風俗後  
世之禮樂旣無其本唯屬執事者從事其間故僅足以  
美聲文而侈觀聽耳此治之所以不如古也前聖之制



至周大備周公相成王制禮作樂而教化大行邈乎不可及矣秦廢先代典禮漢因秦制起朝儀作宗廟樂魏晉而後五胡雲擾秦漢之制亦復不存矣唐初襲用隋禮太常多肄者教坊俗樂而已至宋承五季之衰因唐禮作太常因革禮而所製大晟樂號爲古雅及乎靖康之變禮文樂器掃蕩無遺矣元之有國肇興朔漠朝會燕饗之禮多從本俗太祖元年大會諸侯王于阿難河卽皇帝位始建九旂白旗世祖至元八年命劉秉忠許衡始制朝儀自是皇帝卽位元正天壽節及諸王外國來朝冊立皇后皇太子羣臣上尊號進太皇太后皇太

后冊寶暨郊廟禮成羣臣朝賀皆如朝會之儀而大饗宗親錫宴大臣猶用本俗之禮爲多若其爲樂則自太祖徵用舊樂於西夏太宗徵金太常遺樂於燕京及憲宗始用登歌樂祀天於日月山而世祖命宋周臣典領樂工又用登歌樂享祖宗于中書省旣又命王鏞作大成樂詔括民間所藏金之樂器至元三年初用宮縣登歌文武二舞于太廟烈祖至憲宗八室皆有樂章三十年又撰社稷樂章成宗大德間製郊廟曲舞復撰宣聖廟樂章仁宗皇慶初命太常補撥樂工而樂制日備大抵其於祭祀率用雅樂朝會饗燕則用燕樂蓋雅俗兼

用者也元之禮樂揆之於古固有可議然自朝儀既起規模嚴廣而人知九重大君之尊重其樂聲雄偉而宏大又足以見一代興王之象其在當時亦云盛矣今取其可書者著於篇作禮樂志

制朝儀始末

世祖至元八年秋八月己未初起朝儀先是至元六年春正月甲寅太保劉秉忠大司農孛羅奉旨命趙秉溫史杠訪前代知禮儀者肄習朝儀既而秉忠奏曰一人習之雖知之莫能行也得旨許用十人遂徵儒生周鐸劉允中尚文岳忱關思義侯祐賢蕭琬徐汝嘉從亡金

故老烏古倫居貞完顏復昭完顏從愈葛從亮于伯儀  
及國子祭酒許衡太常卿徐世隆稽諸古典參以時宜  
沿情定制而肄習之百日而畢秉忠復奏曰無樂以相  
須則禮不備奉旨搜訪舊教坊樂工得杖鼓色楊皓笛  
色曹楫前行色劉進教師鄭忠依律運譜被諸樂歌六  
月而成音聲克諧陳于萬壽山便殿帝聽而善之秉忠  
及翰林太常奏曰今朝儀既定請備執禮員有旨命丞  
相安童大司農孛羅擇蒙古宿衛士可習容止者二百  
餘人肄之期月七年春二月奏以丙子觀禮前期一日  
布綿蕪金帳殿前帝及皇后臨觀于露階禮文樂節悉

無遺失冬十有一月戊寅秉忠等奏請建官典朝儀帝  
命與尚書省論定以聞八年春二月立侍儀司以忽都  
于思也先乃爲左右侍儀奉御趙秉溫爲禮部侍郎兼  
侍儀司事周鐸劉允中爲左右侍儀使尚文岳忱爲左  
右直侍儀事關思義侯祐賢爲左右侍儀副使蕭琬徐  
汝嘉爲僉左右侍儀事烏古倫居貞爲承奉班都知完  
顏復昭爲引進副使葛從亮爲侍儀署令于伯儀爲尚  
衣局大使夏四月侍儀司奏請製內外仗如歷代故事  
從之秋七月內外仗成遇八月帝生日號曰天壽聖節  
用朝儀自此始

元正受朝儀

前期三日習儀于聖壽萬安寺

或大興教寺

前二日陳設于

殿庭至期大昕侍儀使引導從護尉各服其服入至寢殿前捧牙牌跪報外辦內侍入奏出傳制曰可侍儀俛伏與皇帝出閣陞輦鳴鞭三侍儀使拜通事舍人分左右引擎執護尉劈正斧中行導至大明殿外劈正斧直正門北向立導從倒卷序立帷扇置于錡侍儀使導駕時引進使同內侍官引宮人擎執導從入至皇后宮庭捧牙牌跪報外辦內侍入啓出傳旨曰可引進使俛伏與皇后出閣陞輦引進使引導從導至殿東門外引進

使分退押直至聖塗之次引導從倒卷出俟兩宮升御  
榻鳴鞭三劈正斧退立於露階東司晨報時雞唱畢尚  
引引殿前班皆公服分左右入日精月華門就起居位  
相向立通班舍人唱曰左右衛上將軍兼殿前都點檢  
臣某以下起居尚引唱曰鞠躬曰平身引至丹墀拜位  
知班報班齊宣贊唱曰拜通贊贊曰鞠躬曰拜曰興曰  
拜曰興曰都點檢稍前宣贊報曰聖躬萬福通贊贊曰  
復位曰拜曰興曰拜曰興曰平身曰搢笏曰鞠躬曰三  
舞蹈曰跪左膝三叩頭曰山呼曰山呼曰再山呼凡傳  
山呼控鶴呼課應和曰萬歲傳再  
山呼應曰萬萬歲後傲此 曰出笏曰就拜曰興曰拜

日興曰拜日興曰平立宣贊唱曰各恭事兩班點檢宣  
徽將軍分左右陞殿宿直以下分立殿前尚廡分立仗  
南管旗分立大明門南楹俟后妃諸王駙馬以次賀獻  
禮畢典引引丞相以下皆公服入日精月華門就起居  
位通班唱曰文武百僚開府儀同三司錄軍國重事監  
脩國史右丞相具官無常臣某以下起居典引贊曰鞠躬曰  
平身引至丹墀拜位知班報班齊宣贊唱曰拜通贊贊  
曰鞠躬曰拜日興曰拜日興曰平身日搢笏曰鞠躬曰  
三舞蹈曰跪左膝三叩頭曰山呼曰山呼曰再山呼曰  
出笏曰就拜日興曰拜日興曰拜日興曰平身侍儀使



詣丞相前請進酒雙引升殿前行樂工分左右引登歌者及舞童舞女以次升殿門外露階上登歌之曲各有

名音中本月之律

先期儀鳳司運譜翰林院撰辭肆之

丞相至宇下褥位

立侍儀使分左右北向立俟前行色曲將半舞旋列定通贊唱曰分班樂作侍儀使引丞相由南東門入宣徽使奉隨至御榻前丞相跪宣徽使立於東南曲終丞相祝贊曰溥天率土祈天地之洪福同上皇帝皇后億萬歲壽宣徽使答曰如所祝丞相俛伏興退詣進酒位尚醢官以觴授丞相丞相搢笏捧觴北面立宣徽使復位前行色降舞旋至露階上教坊奏樂樂舞至第四拍丞

相進酒皇帝舉觴宣贊唱曰殿上下侍立臣僚皆再拜

通贊贊曰鞠躬曰拜曰興曰拜曰興曰平身丞相三進

酒畢以觴授尚醞官出笏侍儀使雙引自南東門出復

位樂止

至元七年進酒儀班首至殿前褥位立前行進曲尚醞官執空盃自正門出授班首班首搢笏

執空盃由正門入至御榻前跪俟曲終以盃授尚醞官出笏祝贊宣徽使曰諾班首俛伏與班首宣徽使由南東門出各復位班首以下舞蹈山呼五拜百官分班教坊奏樂尚醞官進酒殿上下侍立臣僚皆再拜三進酒畢班首降至丹墀至元十八年十二月二十八日改今儀

通贊贊曰合班禮部官押

進奏表章禮物二案至橫階下宣禮物舍人進讀禮物

日至第二重階俟進讀表章官等

翰林國史院屬官一人

至字下

齊跪宣表目舍人先讀中外百司表目翰林院官讀中

書省表畢皆俛伏興退降第一重階下立俟進讀禮物  
舍人陞階至宇下跪讀禮物目畢俛伏興退同降至橫  
階隨表章西行至右樓下侍儀仍領之禮物東行至左  
樓下太府受之宣贊唱曰拜通贊贊曰鞠躬曰拜曰興  
曰平身曰搢笏曰鞠躬曰三舞蹈曰跪左膝三叩頭曰  
山呼曰山呼曰再山呼曰出笏曰就拜曰興曰拜曰興  
曰拜曰興曰平立僧道耆老外國藩客以次而賀禮畢  
大會諸王宗親駙馬大臣宴饗殿上侍儀使引丞相等  
陞殿侍宴凡大宴馬不過一羊雖多必以獸人所獻之  
鮮及脯鱸折其數之半預宴之服衣服同制謂之質孫

宴饗樂節  
見宴樂篇

四品以上賜酒殿上典引引五品以下賜酒  
于日精月華二門之下宴畢鳴鞭三侍儀使導駕引進  
使導后還寢殿如來儀

天壽聖節受朝儀

如元正儀

郊廟禮成受賀儀

如元正儀

皇帝卽位受朝儀

前期三日習儀于萬安寺前二日陳設于殿庭前一日  
設宣詔位于闕前至期大昕侍儀使引導從護尉各服  
其服至皇太子寢閣前捧牙牌跪報外辦內侍傳旨曰  
可侍儀使俛伏興皇太子出閣侍儀使前導由崇天門

入升大明殿引進使引導從至皇太子妃閣前跪報外  
辦內侍出傳旨曰可引進使俛伏興前導由鳳儀門入  
俟諸王以國禮扶皇帝登寶位畢鳴鞭三尚引引點檢  
以下皆公服入就起居位

起居贊拜如  
元正朝儀

兩班點檢宣徽

將軍宿直尚廐管旗各恭事俟后妃諸王駙馬以次賀  
獻禮畢參議中書省事四人以篚奉詔書由殿左門入  
至御榻前參議中書省事跪奏詔文俛伏興以詔受典  
瑞使押寶畢置于篚對舉由正門出樂作至闕前以詔  
置于案文武百僚各公服就位北向立侍儀使稱有制  
宣贊唱曰拜通贊贊曰鞠躬曰拜曰興曰拜曰興曰平

身曰班首稍前典引引班首至香案前通贊贊曰跪曰  
在位官皆跪司香贊曰搯笏通贊贊曰上香曰上香曰  
三上香曰出笏曰就拜曰興曰復位宣贊唱曰拜通贊  
贊曰鞠躬曰拜曰興曰拜曰興曰平身侍儀使以詔授  
左司郎中郎中跪受同譯史稍西陞木榻東向宣讀通  
贊贊曰在位官皆跪讀詔先以國語宣讀隨以漢語譯  
之讀畢降榻以詔授侍儀使侍儀使置于案通贊贊曰  
就拜曰興曰拜曰興曰拜曰興曰搯笏曰鞠躬曰三舞  
蹈曰跪左膝三叩頭曰山呼曰山呼曰再山呼曰出笏  
曰就拜曰興曰拜曰興曰拜曰興曰平立典引引丞相

以下皆公服入起居位

起居拜舞祝頌進酒獻表賜宴並同元正受朝儀

宴畢

鳴鞭三侍儀使導駕引進使導后入寢殿如來儀次日以詔頒行

### 羣臣上皇帝尊號禮成受朝賀儀

前期二日儀鸞司設大次于大明門外又設進冊案于殿內御座前之西進寶案于其東設受冊案于御座上之西受寶案于其東侍儀司設冊案于香案南寶案又于其南禮儀使位于前冊使冊副位于廷中北面引冊奉冊舉冊讀冊捧冊官位于右引寶奉寶舉寶讀寶捧寶官位于左以北爲上百官自金玉府迎冊寶奉安中

書省如常儀前期一日右丞相率公卿朝服儀衛音樂  
導冊寶二案出自中書至闕前控鶴奠案方輿中道冊  
使等奉隨入大次內方輿奠案侍儀使引冊使以下由  
左門以出百官趨退至期大昕右丞相以下百官各公  
服集闕廷儀仗護尉就位侍儀使禮儀使引導從導皇  
帝升大明殿引進使引導從導皇后陞殿尚引引殿前  
班入起居位起居山呼拜舞畢宣贊唱曰各恭事皇太  
子諸王后妃公主以次陞殿鳴鞭三侍儀使引冊引寶  
導冊寶由正門入樂作奉冊使右丞相率冊官由右門  
入奉寶使御史大夫率寶官由左門入至殿下置冊案



于香案南寶案又奠于其南樂止侍儀使引冊使以下  
就起居位典引引羣臣入就位通班舍人唱曰文武百  
僚具官臣某以下起居典引贊曰鞠躬曰平身引至丹  
墀拜位宣贊唱曰拜通贊贊拜舞蹈山呼如常儀畢承  
奉班都知唱曰奉冊使以下進上冊寶侍儀司引冊使  
以下進就位樂作掌儀贊曰奉冊寶官稍前搢笏捧冊  
寶侍儀使前導由中道升正階立于下俟奉冊使諸冊  
官由右階躋奉寶使諸寶官由左階躋畢俱由左門入  
奉冊寶至御榻褥位前冊西寶東樂止掌儀贊曰捧冊  
寶官稍前以冊寶跪置于案曰出笏曰就拜曰興曰平

身曰復位曰奉冊使以下皆跪曰舉冊官興俱至案前  
跪曰搢笏取冊于匣置于盤對舉曰讀冊官興俱至案  
前跪曰讀冊讀冊官稱臣某謹讀冊讀畢舉冊官納冊  
于匣興以授典瑞使出笏立于冊案西南典瑞使置于  
受冊案掌儀贊曰舉寶官興俱至案前跪曰搢笏取寶  
于盃對舉曰讀寶官興俱至案前跪曰讀寶讀寶官稱  
臣某謹讀寶讀畢舉寶官納寶于盃興以授典瑞使出  
笏立于寶案東南典瑞使置于受寶案掌儀贊曰奉冊  
使以下皆就拜曰興曰平身參議中書省事四人以篚  
奉詔書由殿左門入至御榻前跪讀詔文如常儀授典

瑞使押寶畢置于篚對舉由正門出至丹墀北置于詔案冊使以下由南東門出就位聽詔如儀儀鸞使四人舁進冊寶案由左門出侍儀使引班首由左階躋前行色樂作至宇下樂止舞旋至露階立班首入殿宣徽使奉隨班首跪宣徽使西北向立班首致詞曰冊寶禮畢願上皇帝皇后萬萬歲壽宣徽使應曰如所祝樂作通贊唱曰分班進酒畢班首由東南門出降階復位樂止通贊唱曰合班奏進表章禮物贊拜舞蹈山呼錫宴並如元正之儀

冊立皇后儀

前期二日儀鸞司設發冊寶案于大明殿御座前稍西設發寶案稍東掌謁設香案于皇后殿前設冊案于殿內座榻前稍西寶案稍東設受冊案于座榻上稍西設受寶案于稍東侍儀司設板位冊使副位于廷中北面冊官位于右寶官位于左禮儀使位于冊案前主節位于太尉左皇后殿廷亦如之至期大昕引贊敘太尉以下于闕廷各公服侍儀使禮儀使引冊使引冊奉冊舉冊讀冊捧冊官由月華門入侍儀使禮儀使引冊副引寶奉寶舉寶讀寶捧寶官由日精門入至露階下依板位立侍儀使捧牙牌入至寢殿前跪報外辦內侍入奏

出傳制曰可侍儀使俛伏興皇帝出閣升輦鳴鞭三侍  
儀使引導從導皇帝入大明殿陞御座鳴鞭三司晨報

時雞唱畢尚引引殿前班入起居位

起居贊拜舞  
蹈山呼如儀

宣贊

唱曰各恭事引贊引冊使以下入就位掌儀舍人引承  
奉班都知侍儀使禮儀使主節捧冊捧寶官升自左階  
由南東門入至御座前分左右相向立掌儀贊曰禮儀  
使稍前跪曰太尉以下皆跪禮儀使跪奏請進發皇后  
冊寶掌儀贊曰就拜曰興曰平身曰太尉以下皆興曰  
復位掌儀贊曰內謁者稍前曰搢笏曰捧冊寶跪進皇  
帝曰以冊寶授捧冊寶官捧冊寶官跪受興掌儀贊曰

主節官搢笏持節禮儀使引節導冊寶由正門出至露階南向立禮儀使稱有制承奉班都知唱曰太尉以下皆再拜通贊曰鞠躬曰拜曰興曰拜曰興曰平身禮儀使宣制曰命太尉某等持節授皇后冊寶通贊贊曰鞠躬曰拜曰興曰拜曰興曰平身降至露階下依次就位掌儀唱曰以冊寶置于案曰出笏曰復位方輿昇以行樂作侍儀使禮儀使引太尉及冊寶官奉隨至皇后宮庭奠案樂止掌儀唱曰捧冊寶官稍前搢笏捧冊寶使太尉以下奉隨由正階階至案前掌儀贊曰以冊寶置于案曰出笏曰復位侍儀使稍前跪報外辦內侍入啓

出傳旨曰可侍儀使俛伏興皇后出閣詣褥位太尉稱制遣臣某等恭授皇后冊寶內侍贊禮曰跪掌儀贊曰太尉以下皆跪內侍贊皇后曰上香曰上香曰三上香曰拜曰興曰拜曰興掌儀贊曰太尉以下皆興皇后陞殿立于座榻前承奉班都知唱曰太尉以下進冊寶掌儀唱曰捧冊寶官稍前搢笏捧冊寶由正門至殿內掌儀贊曰以冊寶跪置于案曰捧冊寶官出笏興復位曰太尉以下皆跪曰舉冊官興至案前跪曰搢笏取冊于匣置于盤對舉曰讀冊官興至案前跪曰讀冊讀冊官稱臣某謹讀冊讀畢納冊于匣掌儀贊曰出笏舉寶官

興至案前跪搢笏取寶于盃對舉曰讀寶官興至案前  
跪曰讀寶讀寶官稱臣某謹讀寶讀畢納寶于盃掌儀  
贊曰出笏曰太尉以下皆就拜曰興曰平身捧冊寶官  
以冊寶授太尉太尉以授掌謁掌謁以冊寶置于受冊  
寶案掌儀唱曰太尉以下跪曰衆官皆跪太尉致祝辭  
曰冊寶禮畢伏願皇后與天同算司徒應曰如所祝就  
拜興平身太尉進酒樂作皇后飲畢樂止禮儀使引節  
引主節由正門以出侍儀使引太尉以下由左門至階  
下北面立承奉班都知唱曰太尉以下皆再拜通贊曰  
鞠躬曰拜曰興曰拜曰興曰平立侍儀使引太尉以下



還詣皇帝御座前跪奏曰奉制授皇后冊寶謹以禮畢  
就拜興由左門出降詣旁折位侍儀使引導從導皇后  
詣大明殿前謝恩掌謁贊曰拜曰興曰拜曰興侍儀使  
分退掌謁導皇后升御座典引引丞以下入起居位

起居贊  
拜如儀

侍儀使詣右丞相前請進酒雙引陞殿至宇下

褥位立侍儀使分左右北向立俟前行色曲將半舞旋  
列定通贊唱曰分班樂作侍儀使引右丞相由南東門  
入宣徽使奉隨至御榻前右丞相跪宣徽使立于東南  
曲終右丞相祝贊曰冊寶禮畢臣等不勝慶抃同上皇  
帝皇后萬萬歲壽宣徽使應曰如所祝右丞相俛伏興

退詣進酒位

進酒進表章禮物贊拜僧道賀獻大宴殿上並如元正儀

宴畢鳴鞭三

侍儀使導駕引進使導后還寢殿如來儀

冊立皇太子儀

前期三日右丞相率百僚至金玉局冊寶案前舍人贊

曰鞠躬曰拜曰興曰拜曰興曰平身曰班首稍前曰跪

曰在位官皆跪曰搢笏曰上香曰上香曰三上香曰出

笏曰就拜曰興曰拜曰興曰拜曰興曰平身侍儀使舍

人分引羣臣儀衛音樂導至中書省正位安置前期二

日儀鸞司設發冊案于大明殿御座西發寶案于東典

寶官設香案于太子殿前階上設冊案于西寶案于東

又設受冊案于殿內座榻之西受寶案于東侍儀司設板位太尉冊使副位于大明殿廷太尉位居中冊官位于右寶官位于左禮儀使位于前主節官位于太尉之左太子殿廷亦如之樂位布置亦如之右丞相率百僚朝服至中書省冊寶案前敘立定舍人贊曰鞠躬曰拜曰興曰拜曰興曰平身曰班首稍前曰跪曰搢笏曰在位官皆跪曰上香曰上香曰三上香曰出笏曰就拜曰興曰拜曰興曰拜曰興曰平立舍人分引羣臣儀衛導從音樂傘扇導至闕前控鶴奠案方輿官昇之由中道入崇天門冊使以下奉隨至露階下方輿官置冊案于

西寶案于東分退立于兩廡冊使副北面引冊官舉冊  
官讀冊官捧冊官位于冊案西東向引寶官舉寶官讀  
寶官捧寶官位于寶案東西向掌儀舍人贊曰捧冊官  
稍前曰搢笏曰捧冊又贊曰捧寶官稍前曰搢笏曰捧  
寶侍儀使引進使引冊官引寶官前導捧冊寶官次之  
冊使副以下奉隨升大明殿午階由正門入至進發冊  
寶案前冊使副北面立引冊官引寶官舉冊官舉寶官  
以下分左右夾冊寶案立掌儀贊曰以冊寶置于案曰  
出笏曰復位侍儀使引奉冊使以下由左門出百辟趨  
退至期大昕引贊引冊使以下皆公服敘位于闕廷侍

儀使導從皇帝出閣鳴鞭三陞大明殿登御座尚引引殿前班入起居位起居贊拜如儀宣贊唱曰各恭事引贊引冊使以下入就位掌儀舍人引承奉班都知侍儀使禮儀使主節郎捧冊捧寶官升自左階由左門入至御座前分左右立掌儀贊曰禮儀使稍前曰跪曰衆官皆跪禮儀使奏請發皇太子冊寶掌儀唱曰就拜曰興曰平身曰衆官皆興曰復位曰內謁者稍前曰搢笏曰捧冊寶跪進皇帝曰以冊寶授捧冊寶官捧冊寶官跪受興掌儀贊曰主節郎搢笏持節禮儀使引節導冊寶由正門以出至露階南向立禮儀使稱有制承奉班都

知唱曰太尉以下皆再拜掌儀贊曰鞠躬曰拜曰興曰  
拜曰興曰平身禮儀使宣制曰上命太尉等持節授皇  
太子冊寶掌儀贊曰鞠躬曰拜曰興曰拜曰興曰平身  
禮儀使引節導冊寶降至露階下依次就位掌儀贊曰  
以冊寶置于案曰出笏曰復位方輿昇以行樂作侍儀  
使禮儀使主節前導冊使以下奉隨由正門出至闕前  
方輿奠案控鶴昇以行至皇太子殿廷控鶴奠案方輿  
昇以行入至露階下奠案方輿退樂止冊使以下以次  
立掌儀贊曰捧冊寶官稍前摺笏捧冊寶侍儀使引節  
主節導冊寶以行冊使以下由正階躋節立于香案之

西掌儀贊曰捧冊寶官跪以冊寶置于案曰出笏曰興  
曰就位右庶子跪報外備內侍入啓出傳旨曰可右庶  
子俛伏興皇太子出閣立于香案前掌儀贊曰皇太子  
跪曰上香曰上香曰三上香曰拜曰興曰拜曰興太尉  
前稱制遣臣某等恭授皇太子冊寶復位掌儀贊曰皇  
太子拜曰興曰拜曰興請皇太子詣禱位南向立曰皇  
太子跪曰諸執事官皆跪曰舉冊官興至案前曰跪曰  
讀冊讀畢曰納冊于匣曰出笏掌儀唱曰舉寶官興至  
案前曰跪曰讀寶讀畢曰納寶于盞曰出笏曰舉冊寶  
官讀冊寶官皆興復位掌儀贊曰太尉進授冊寶侍儀

使引太尉司徒至冊寶案前搢笏以冊寶跪進皇太子  
恭受以授左右庶子左右庶子搢笏跪受掌儀贊曰皇  
太子興冊使以下皆興右庶子捧冊左庶子捧寶導皇  
太子入殿右庶子奠冊于授冊案左庶子奠寶于受寶  
案引節引主節立于殿西北引贊引太尉以下降階復  
位北向立承奉班都知唱曰太尉以下皆再拜掌儀贊  
曰鞠躬曰拜曰興曰拜曰興曰平身樂作侍儀使詣太  
尉前請進酒太尉入至殿內進酒畢降復位樂止侍儀  
使禮儀使主節導太尉以下還詣大明殿御座前跪奏  
曰奉制授皇太子冊寶謹以禮畢俛伏興降詣位侍儀



使左右庶子導皇太子詣大明殿御座前謝恩右庶子贊曰拜曰興曰拜曰興進酒又贊曰拜曰興曰拜曰興降殿還府侍儀使詣右丞相前請進酒雙引陞殿至宇下褥位立侍儀使分左右北向立俟前行色曲將半舞旋列定通贊唱曰分班樂作侍儀使右丞相由南東門入宣徽使奉隨至御榻前右丞相跪宣徽使立于東南曲終右丞相祝贊曰皇太子冊寶禮畢臣等不勝慶抃同上皇帝皇后萬萬歲壽宣徽使應曰如所祝右丞相俛伏興退詣進酒位進酒進表章禮物贊拜如元正儀駕輿鳴鞭三侍儀使導駕還寢殿如來儀皇太子還府

陞殿典引引羣臣入就起居位通班自班西行至中道  
唱曰具官某以下起居典引贊曰鞠躬曰平身進就拜  
位宣贊唱曰拜通贊贊曰鞠躬曰拜曰興曰拜曰興曰  
平身侍儀使詣班首前請進酒雙引由左階至殿宇下  
褥位立侍儀分左右北向立俟前行色曲將半舞旋列  
定通贊唱曰分班班首入自左門右庶子隨至座前班  
首跪右庶子立于東南俟曲終班首致祝詞曰冊寶禮  
畢願上殿下千秋之壽右庶子應曰如所祝班首俛伏  
興退至進酒位搯笏捧觴北向立右庶子退復位俟舞  
旋至露階樂舞至第四柏班首進酒宣贊唱曰文武百

僚皆再拜通贊贊曰鞠躬曰拜曰興曰拜曰興曰平身  
班首自東門出復位樂止通贊唱曰合班中書押進箋  
及禮物案至橫階下進讀箋官由左階齊進讀禮物官  
至階下俟進讀箋官至宇下先讀箋目次讀箋讀畢俛  
伏興降至階下進讀禮物官升階至宇下跪讀禮物狀  
畢俛伏興退同讀箋官至橫階隨箋案西行至右廡下  
禮物案東行至左廡下各付所司宣贊唱曰拜通贊贊  
曰鞠躬曰拜曰興曰拜曰興曰平立右庶子導皇太子  
還閣

太皇太后上尊號進冊寶儀

前期二日儀鸞司設進發冊寶案于大明殿御座之前  
掌謁設進冊寶案于太皇太后殿座榻前設受冊寶案  
于座榻上並冊西寶東侍儀司設冊使副位于廷中北  
面冊官位右寶官位左禮儀使位于前以北爲上太皇  
太后殿廷亦如之至期大昕羣臣皆公服敘位闕前侍  
儀使禮儀使引冊使引冊奉冊舉冊讀冊捧冊官由月  
華門入侍儀使禮儀使引冊副引寶奉寶舉寶讀寶捧  
寶官由日精門入至露階下依板位立侍儀使捧牙牌  
入至寢殿前跪報外辦內侍入奏出傳制曰可侍儀使  
俛伏興皇帝出閣升輦鳴鞭三入大明殿陞御座鳴鞭

三司晨報時雞唱畢侍儀使禮儀使引冊使以下陞自東階由左門入至御榻前相向立掌儀贊曰奏中嚴侍儀使捧牙牌跪奏曰中嚴又贊曰就拜曰興曰平身曰復位曰禮儀使稍前跪曰冊使以下皆跪禮儀使奏請進發太皇太后冊寶掌儀贊曰就拜曰興曰平身曰復位曰內謁者稍前曰摺笏奉冊寶上進曰冊使副捧冊寶官稍前曰摺笏曰內謁者跪進冊寶皇帝興以冊授冊使冊使跪受興以授捧冊官出笏以寶授冊副冊副跪受興以授捧寶官出笏侍儀使禮儀使引冊引寶官導冊寶由正門出冊使以下奉隨至階下掌儀贊曰以

冊寶置于案曰出笏復位方輿昇行樂作侍儀使禮儀使引冊引寶前導冊使以下奉隨至興聖宮前奠案樂止侍儀使以導從入至太皇太后寢殿前跪報外辦掌謁入啓出傳旨曰可侍儀使俛伏興侍儀使掌謁前導太皇太后陞殿導太皇太后時侍儀使入至大明殿跪奏冊寶至興聖宮請行禮駕興鳴鞭三侍儀使前引導從至興聖宮陞御座侍儀使出至案所樂作方輿入至露階下奠案冊使副立于案前冊官東向寶官西向方輿分退立于兩廡樂止尚引引殿前班入起居位相向立起居拜舞如元正儀禮畢宣贊唱曰各恭事贊引冊

使以下退至起居位通班舍人唱曰攝某官具官

或太尉具

官無常臣某以下起居引贊贊曰鞠躬曰平身進入丹墀

知班唱曰班齊宣贊唱曰拜通贊贊曰鞠躬曰拜曰興  
曰拜曰興曰平身宣贊唱曰各恭事進至案前依位立  
宣贊唱曰太尉以下進上冊寶掌儀贊曰捧冊寶官稍  
前指笏捧冊寶侍儀使引冊寶官前導冊使奉隨至御  
榻進冊寶案前掌儀唱曰跪捧冊寶官不跪曰以冊寶  
置于案曰捧冊寶官出笏復位曰太尉以下皆跪曰讀  
舉冊寶官興俱至案前跪掌儀贊曰舉冊官指笏取冊  
于匣置于盤對舉曰讀冊讀冊官稱臣某謹讀冊讀畢

舉冊官納冊于匣掌儀贊曰出笏曰舉寶官摺笏取寶于盃對舉曰讀寶讀寶官稱臣某謹讀寶讀畢舉寶官納寶于盃掌儀贊曰出笏曰就拜曰興曰平身曰衆官皆興曰復位曰太尉司徒奉冊寶官稍前曰捧冊寶官稍前曰摺笏曰捧冊寶上進曰皇帝躬授太皇太后冊寶太皇太后以冊寶授內掌謁內掌謁置于案皇帝興進酒太皇太后舉觴飲畢皇帝復御座畢掌儀贊曰衆官皆復位侍儀使引冊使以下分左右出就位皇帝率皇后及后妃公主降丹墀北面拜賀陞殿皇太子及諸王拜賀陞殿典引引百官入就起居位通班舍人唱曰



文武百僚具官臣某以下起居曰鞠躬曰平身引至丹  
墀拜位知班報班齊宣贊唱曰拜通贊贊曰鞠躬曰拜  
曰興曰拜曰興曰平身侍儀使詣班首前請進酒雙引  
至殿宇下褥位立俟舞旋列定通贊唱曰分班樂作侍  
儀使引班首由南東門入宣徽使奉隨至御榻前班首  
跪曲終班首祝贊曰冊寶禮畢臣等不勝欣抃願上太  
皇太后皇帝億萬歲壽宜徽使應曰如所祝班首俛伏

興退詣進酒位

以下並同  
元正儀

皇太后上尊號進冊寶儀

同前儀

太皇太后加上尊號進冊寶儀

同前儀

進發冊寶導從

清道官二人警蹕二人並分左右皆攝官服本品朝服  
雲和樂一部署令二人分左右次前行戲竹一次排簫  
四次簫管四次板二次歌四並分左右前行內琵琶二  
十次箏十六次篪篥十六次簫十六次方響八次頭管  
二十八次龍笛二十八爲三十三重重四次杖鼓三十

爲八重次板八爲四重板內大鼓二工二人舁八人樂  
工服並與鹵簿同法物庫使二人服本品服次朱團扇  
八爲二重次小雉扇八次中雉扇八次大雉扇八分左  
右爲十二重次朱團扇八爲二重次大傘二次華蓋二

元史卷六十七 禮樂志 三  
次紫方傘二次紅方傘二次曲蓋二並分左右執傘扇  
所服並同立仗

圍子頭一人中道次圍子八人分左右服與鹵簿內同  
安和樂一部署令二人服本品服札鼓六爲二重前四  
後二次和鼓一中道次板二分左右次龍笛四次頭管  
四並爲二重次羌管二次笙二並分左右次雲璈一中  
道次箏二分左右樂工服與鹵簿內同

傘一中道椅左踏右執人皂巾大團花緋錦襖金塗銅  
束帶行滕鞋鞵

拱衛使一人服本品服

舍人二人次引寶官二人並分左右服四品服

香案中道與士控鶴八人服同立仗內表案與士侍香二人分左右服四品服

寶案中道與士控鶴十有六人服同香案與士方輿官三十人夾香案寶案分左右而趨至殿門則控鶴退方輿官昇案以陞唐巾紫羅窄袖衫金塗銅束帶烏靴引冊二人四品服

香案中道與士控鶴八人服同寶案與士侍香二人分左右服四品服

冊案中道與士控鶴十有六人服同寶案與士方輿官

三十人夾香案冊案分左右而趨至殿門則控鶴退方輿官昇案以陞巾服與寶案方輿官同

葆蓋四十人次閱仗舍人二人服四品服次小戟四十人次儀鎧四十人夾雲和樂傘扇分左右行服同立仗供衛使二人服本品朝服次班劔十次梧杖十二次斧十二次鐙杖二十次列絲十皆分左右次水觀左金盆右次列絲十次立瓜十次金杙左鞭桶右蒙鞍左散手右次立瓜十次臥瓜三十並夾葆蓋小戟儀鎧分左右行服並同鹵簿內

拱衛外舍人二人服四品服引導冊諸官次從九品以

上次從七品以上次從五品以上並本品朝服

金吾折衝二人牙門旗二每旗引執五人次青稍四十人赤稍四十人黃稍四十人白稍四十人紫稍四十人並兜鍪甲靴各隨稍之色行導冊官外

冊案後舍人二人服四品服次太尉右司徒左次禮儀使二人分左右次舉冊官四人右舉寶官四人左次讀冊官二人右讀寶官二人左次閣門使四人分左右並本品服

知班六人分左右服同立仗往來視諸官之失儀者而行罰焉

冊寶攝官

上尊號冊寶凡攝官二百一十有六人奉冊官四人奉  
寶官四人捧冊官二人捧寶官二人讀冊官二人讀寶  
官二人引冊官五人引寶官五人典瑞官三人糾儀官  
四人殿中侍御史二人監察御史四人閣門使三人清  
道官四人點試儀衛五人司香四人備顧問七人代禮  
官三十人拱衛使二人押仗二人方輿一百六十人  
上皇太后冊寶凡攝官百五十人攝太尉一人攝司徒  
一人禮儀使四人奉冊官二人奉寶官二人引冊官二  
人引寶官二人舉冊官二人舉寶官二人讀冊官二人

讀寶官二人捧冊官二人捧寶官二人奏中嚴一人主當內侍十人閣門使六人充內臣十三人糾儀官四人代禮官四十二人掌謁四人司香十二人折衝都尉二人拱衛使二人清道官四人警蹕官四人方輿官百二十人

上太皇太后冊官攝官同前

授皇后冊寶凡攝寶官百八十人攝太尉一人攝司徒一人主節官二人禮儀使四人奉冊官二人奉寶官二人引冊官二人引寶官二人舉冊官二人舉寶官二人讀冊官二人讀寶官二人內臣職掌十人宣徽使二人



閣門使四人代禮官三十七人侍香二人清道官四人  
折衝都尉二人警蹕官四人中宮內臣九人糾儀官四  
人接冊內臣二人接寶內臣二人方輿官七十四人  
授皇太子冊凡攝官四十有九人攝太尉一人奉冊官  
二人持節官一人捧冊官二人讀冊官二人引冊官二  
人攝禮儀使二人主當內侍六人副持節官五人侍從  
官十一人代禮官十六人

攝行告廟儀

如受尊號上太皇太后皇太后冊寶  
冊立皇后皇太子凡國家大典禮皆

告宗  
廟

前期二日太廟令掃除內外翰林國史院學士譔寫祝

文前一日告官等致齋一日其日告官等各服紫服奉  
祝版進請御署訖差控鶴用紅羅銷金案擡昇覆以黃  
羅帕并奉御香御酒如常儀迎至祝所齋宿告日質明  
前三刻禮直官引太廟令率其屬入廟殿開室陳設如  
儀禮直官引告官等各服紫服以次入就位東向立定  
禮直官稍前贊曰有司謹具請行事贊者曰再拜在位  
者皆再拜禮直官先引執事者各就位次引告官詣盥  
洗爵洗位北向立搯笏盥手帨手洗爵拭爵訖執笏請  
詣酒尊所搯笏執爵司尊者舉巵良醞令酌酒以爵授  
奉爵官執笏詣太祖室再拜執事者奉香告官搯笏跪

元史卷六十一 禮樂志 三十一  
三上香執爵三祭酒以虛爵授奉爵官執笏俛伏興舉  
祝官搢笏跪對舉祝版讀祝官跪讀祝文訖奠祝於案  
執笏俛伏興禮直官贊告官再拜畢每室並如上儀告  
畢引告官以下降復位再拜訖詣望座燔祝再拜半燎  
告官以下皆退

國史院進先朝實錄儀

是日大昕諸司官具公服立于光天門外侍儀使引實  
錄案以入監脩國史以下奉隨至光天殿前分班立皇  
帝陞御座宣贊唱曰拜通贊贊曰鞠躬曰拜曰興曰拜  
曰興曰平身待制四人奉實錄陞自午階監脩國史以

下奉隨至御前香案南立衆官降復位應奉翰林文字  
陞至實錄前跪讀表讀畢俛伏興復位翰林學士承旨  
陞至御前分班立俟御覽畢降復位宣贊唱曰監脩國  
史以下皆再拜通贊贊曰鞠躬曰拜曰興曰拜曰興曰  
平身待制陞取實錄降自午階置于案由光天門以出  
音樂儀從前導還國史院置于堂上通贊贊曰鞠躬曰  
拜曰興曰拜曰興曰平身曰搢笏曰上香曰上香曰三  
上香曰出笏曰就拜曰興曰拜曰興曰拜曰興曰平立  
百僚趨退

元史卷六十七

元史卷六十八

明翰林學士亞中大夫知制誥兼修國史宋 濂等修

禮樂志第十九

禮樂二

制樂始末

太祖初年以河西高智耀言徵用西夏舊樂太宗十年十一月宣聖五十一代孫衍聖公元措來朝言于帝曰今禮樂散失燕京南京等處亡金太常故臣及禮冊樂器多存者乞降旨收錄於是降旨令各處管民官如有亡金知禮樂舊人可并其家屬徙赴東平令元措領之

於本路稅課所給其食十一年元措奉旨至燕京得金  
掌樂許政掌禮王節及樂工翟剛等九十二人十二年  
夏四月始命製登歌樂肄習于曲阜宣聖廟十六年太  
常用許政所舉大樂令苗蘭詣東平指授工人造琴十  
張一絃三絃五絃七絃九絃者各二憲宗二年三月五  
日命東平萬戶嚴忠濟立局製冠冕法服鐘磬筍簏儀  
物肄習五月十三日召太常禮樂人赴日月山八月七  
日學士魏祥卿徐世隆郎中姚樞等以樂工李明昌許  
政吳德段楫寇忠杜延年趙德等五十餘人見于行宮  
帝問制作禮樂之始世隆對曰堯舜之世禮樂興焉時

明昌等各執鐘磬笛簫篪塤巢笙於帝前奏之曲終復合奏之凡三終十一日始用登歌樂祀昊天上帝于日月山祭畢命驛送樂工還東平三年時世祖居潛邸命勾當東平府公事宋周臣兼領大樂禮官樂工人等常令肄習仍令萬戶嚴忠濟依已降旨存恤六年夏五月世祖以潛邸次灤州下教命嚴忠濟督宋周臣以所得禮樂舊人肄習宜如故事勉行之毋忽冬十有一月敕樂工老不堪任事者以子孫代之不足者以他戶補之中統元年春正月命宣撫廉希憲等召太常禮樂人至燕京夏六月命許唐臣等制樂器公服法服秋七月七



日工畢十一日用新製雅樂享祖宗于中書省禮畢賜預祭官及禮樂人百四十九人鈔有差八月命太常禮樂人復還東平二年秋九月敕太常少卿王鏞領東平樂工常加督視肄習以備朝廷之用五年太常寺言自古帝王功成作樂樂各有名盛德形容於是乎在伏觀皇上踐阼以來留心至治聲名文物思復承平之舊首敕有司脩完登歌宮縣八佾樂舞以備郊廟之用若稽古典宜有徽稱謹案歷代樂名黃帝曰咸池龍門大卷少昊大淵頌頊六莖高辛五英唐堯大成大章虞舜大韶夏禹大夏商湯大濩周武大武降及近代咸有厥名

宋總名曰大晟金總名曰大和今採輿議權以數名伏  
乞詳定曰大成按尚書簫韶九成鳳凰來儀樂記曰王  
者功成作樂詩云展也大成曰大明按白虎通言如唐  
堯之德能大明天人之道曰大順易曰天之所助者順  
又曰順乎天而應乎人曰大同樂記曰樂者爲同禮者  
爲異禮運曰大道之行也故人不獨親其親不獨子其  
子是之謂大同曰大豫易曰豫順以動故天地如之象  
曰雷出地奮豫先王以作樂崇德殷薦之上帝以配祖  
考中書省遂定名曰大成之樂乃上表稱賀表曰離日  
中天已覩文明之化豫雷出地又聞正大之音神人以

和祖考來格欽惟皇帝陛下潤色洪業游意太平爰從  
龍邸之潛久敬鳳儀之奏及登寶位申命鼎司謂雖陳  
堂上之登歌而尚闕庭前之佾舞方嚴禋祀當備聲容  
屬天語之一宣迺春官之畢會臣等素無學術徒有汗  
顏聿求舊署之師工仍討累朝之典故按圖索器永言  
和聲較鍾律於積黍之中續琴調於絕絃之後金而模  
石而琢簾斯豎筍斯橫合八音而克諧閱三歲而始就  
列文武兩階之干羽象帝王四面之宮庭一洗哇淫之  
聲可謂盛大之舉旣完雅器未錫嘉名蓋聞軒昊以來  
俱有成雲之號莖英章韶以象德夏漢武勺以表功洪

惟國朝誕受天命地大物鉅人和歲豐宜符古記之文  
稱曰大成之樂漢庭聚議作章敢望於一夔舜殿鳴弦  
率舞願觀於百獸至元元年冬十有一月括金樂器散  
在寺觀民家者先是括到燕京鐘磬等器凡三百九十  
有九事下翟剛辨驗給價至是大興府又以所括鐘磬  
樂器十事來進太常因言亡金散失樂器若止於燕京  
拘括似爲未盡合於各路各觀民家括之庶省鑄造於  
是奏檄各道宣慰司括到鐘三百六十有七磬十有七  
罇一送于太常又中都宣德平灤順天河東真定西京  
大名濟南北京東平等處括到大小鐘磬五百六十有

九其完者景鐘二鈔鐘十六大聲鐘十中聲鐘一小聲鐘二十有七編鐘百五十有五編磬七其不完者景鐘四鈔鐘二十有三大聲鐘十有二中聲鐘一小聲鐘四十有五編鐘二百五十有一編磬十有四三年初用宮縣登歌樂文武二舞于太廟先是東平萬戶嚴光範奏太常登歌樂器樂工已完宮縣樂文武二舞未備凡用人四百一十二請以東平漏籍戶充之合用樂器官爲置備制可命中書省臣議行於是中書命左三部太常寺少府監於興禪寺置局委官楊天祐太祝郭敏董其事大樂正翟剛辨驗音律充收受樂器官丞相耶律鑄

又言今製宮縣大樂內編磬十有二簾宜於諸處選石  
材爲之太常寺以新撥宮縣樂工文武二舞四百一十  
二人未習其藝遣大樂令許政往東平教之大樂署言  
堂上下樂舞官員及樂工合用衣服冠冕鞞履等物乞  
行製造中書禮部移準太常博士議定制度下所屬製  
造宮縣樂器既成大樂署郭敏開坐名數以上編鐘磬  
三十有六簾樹鼓四建鞞應  
同一座晉鼓一路鼓二鼗鼓二相  
鼓二雅鼓二祝一敔一笙二十有七巢和  
芋塤八篴簫箏  
笛各十琴二十有七瑟十有四單鐸雙鐸鏡錔鉦麾旌  
纛各二補鑄編鐘百九十有二靈壁石磬如其數省臣

言太廟殿室向成宮縣樂器咸備請徵東平樂工赴京  
師肄習以俟享廟制可秋七月新樂服成樂工至自東  
平敕翰林院定撰八室樂章大樂署編運舞節俾肄習  
之冬十有一月有事于太廟宮縣登歌樂文武二舞咸  
備其迎送神曲曰來成之曲烈祖曰開成之曲太祖曰  
武成之曲太宗曰文成之曲皇伯考木赤曰弼成之曲  
皇伯考察合帶曰協成之曲睿宗曰明成之曲定宗曰  
熙成之曲憲宗曰威成之曲初獻升降曰肅成之曲司  
徒奉俎曰嘉成之曲文舞退武舞進曰和成之曲亞終  
獻酌獻曰順成之曲徹豆曰豐成之曲文舞曰武定文

綏之舞武舞曰內平外成之舞第一成象滅王罕二成破西夏三成克金四成收西域定河南五成取西蜀平南詔六成臣高麗服交趾

詳見樂舞篇

十有二月籍近畿儒

戶三百八十四人爲樂工先是召用東平樂工凡四百一十二人中書以東平地遠惟留其戶九十有二餘盡遣還復入民籍十一年秋八月製內庭曲舞中書以上皇帝冊寶下太常太樂署編運無射宮大寧等曲及上壽曲譜

當時議殿庭用雅樂後不果用

十三年以近畿樂戶多逃亡僅得四十有二復徵用東平樂工十六年冬十月命太常卿忽都于思召太常樂工是月十一日大樂令完顏椿



等以樂工見于香閣文郎魏英舞迎神黃鐘曲武郎安  
仁舞亞獻無射宮曲十八年冬十月昭睿順聖皇后將  
耐廟製昭睿順聖皇后室曲舞十九年王積翁奏請徵  
亡宋雅樂器至京師置於八作司二十一年大樂署言  
宜付本署收掌中書命八作司與之鑄鐘二十有七編  
鐘七百二十有三特磬二十有二編磬二十有八鐃六  
單鐸雙鐸各五鉦鐃各八十二年冬閏十有一月太常  
卿忽都干思奏大樂見用石磬聲律不協稽諸古典磬  
石莫善於泗濱女直未嘗得此今泗在封疆之內宜取  
其石以製磬從之選審聽音律大樂正趙榮祖及識辨

磬材石工牛全詣泗州採之得磬璞九十製編磬二百三十命大樂令陳革等料簡應律者百有五二十三年忽都于思又奏太廟樂器編鐘笙匏歲久就壞音律不協遂補鑄編鐘八十有一合律者五十造笙匏三十有四二十九年四月太常太卿香山請采石增製編磬遣孔鑄馳驛往泗州得磬璞五十八製磬九十大樂令毛莊等審聽之得應律磬五十有八於是編磬始備三十年夏六月初立社稷命大樂許德良運製曲譜翰林國史院撰樂章其降送神曰鎮寧之曲初獻盥洗升壇降壇望瘞位皆肅寧之曲正配位奠玉幣曰億寧之曲司

徒奉俎徹豆曰豐寧之曲正配位酌獻曰保寧之曲亞

終獻曰咸寧之曲

按祭社稷先農及大德六年祀天地五方帝樂章皆用金舊各釋奠宣聖

亦因宋不改  
詳樂章篇

三十一年世祖裕宗祔廟命大樂署編運

曲譜舞節翰林定撰樂章世祖室曰混成之曲裕宗室  
曰昭成之曲成宗大德九年新建郊壇既成命大樂署  
編運曲譜舞節翰林撰樂章十一月二十八日祀園丘  
用之其迎送神曰天成之曲初獻奠玉幣曰欽成之曲  
酌獻曰明成之曲登降曰隆成之曲亞終酌獻曰和成  
之曲奉饌徹豆曰寧成之曲望燎如登降

惟用黃  
鐘宮

文舞

曰崇德之舞武舞曰定功之舞十年命江浙行省製造

宣聖廟樂器以宋舊樂工施德仲審較應律運至京師  
秋八月用于廟祀宣聖先令翰林新撰樂章命樂工習  
之降送神曰凝安之曲初獻盥洗陞殿降殿望瘞皆同  
安之曲奠幣曰明安之曲奉俎曰豐安之曲酌獻曰成  
安之曲亞終獻曰文安之曲徹豆曰娛安之曲蓋舊曲  
也新樂章不果用十一年武宗卽位祭告天地命大樂  
署編運皇地祇酌獻大呂宮一曲及舞節翰林撰樂章  
無曲名九月順宗成宗二室祔廟下大樂署編運曲譜舞  
節翰林撰樂章順宗室曰慶成之曲成宗室曰守成之  
曲至大二年親享太廟皇帝入門奏順成之曲盥洗陞

殿用至元中初獻升降肅成之曲亦曰順成之曲出入

小次奏昌寧之曲迎神用至元中來成之曲改曰思成

初獻攝太尉盥洗陞殿奏肅寧之曲酌獻太祖室仍用

舊曲改名開成

開成本至元中烈祖曲名其詞則太祖舊曲也

睿宗室仍用舊

曲改名武成

此亦至元中太祖曲名其詞則神祖創業以下仍舊

皇帝飲福登歌

奏釐成之曲

新製

文舞退武舞進仍用舊曲改名肅寧

舊名和成其詞天生五材孰能去兵以下是也

亞終獻酌獻仍用舊曲改名肅

寧

舊名順成其詞幽明精禋以下是也

徹豆曰豐寧之曲

舊名豐成詞語亦異

送神

曰保成之曲皇帝出廟廷亦曰昌寧之曲

太常集禮曰樂章據孔思

逮本錄之國朝樂章皆用成字凡用寧字者金曲也國初禮樂之事悉用前代舊工循習故常遂有用其舊者

亦有不用其詞而言以舊號者如郊祀先農等樂是也冬十有二月始製先農樂

章以太常登歌樂祀之先是有命祀先農以登歌樂如祭社稷之制大樂署言禮祀先農如社遂錄祭社林鐘宮鎮寧等曲以上蓋金曲也三年冬十月置曲阜宣聖廟登歌樂初宣聖五十四代孫左三部照磨思逮言闕里宣聖祖廟釋奠行禮久闕祭服登歌之樂未蒙寵賜如蒙移咨江浙行省於各處贍學祭餘子粒內製造登歌樂器及祭服以備祭祀庶盡事神之禮中書允其請移文江浙製造至是樂器成運赴闕里用之十有一月敕以二十三日冬至祀昊天上帝于南郊配以太祖合

大樂署運製配位及親祀曲譜舞節翰林撰樂章皇帝  
出入中壝黃鐘宮曲二盥洗黃鐘宮曲一陞殿登歌大  
呂宮曲一酌獻黃鐘宮曲一飲福登歌大呂宮曲一出  
入小次黃鐘宮曲一

皆無  
曲名

四年夏六月武宗祔廟命樂

正謝世寧等編曲譜舞節翰林侍講學士張士觀撰樂  
章曲名威成之曲仁宗皇慶二年秋九月用登歌樂祀

太上皇

睿宗

于真定玉華宮自是歲用之至延祐七年春

三月奏罷延祐五年命各路府宣聖廟置雅樂選擇習  
古樂師教肄生徒以供春秋祭祀六年秋八月議置三  
皇廟樂不果行七年仁宗祔廟命樂正劉瓊等編運酌

獻樂譜舞節翰林撰樂章曲名曰歆成之曲英宗至治  
二年冬十月用登歌樂于太廟是月英宗祔廟下大樂  
署編運樂譜舞節翰林撰樂章曲曰獻成之曲文宗天  
曆二年春三月明宗祔廟下大樂署編運樂譜舞節翰  
林定撰樂章曲曰永成之曲

登歌樂器

金部

編鐘一簋鐘十有六範金爲之筍簋

橫曰筍  
植曰簋

皆雕繪樹

羽塗金雙鳳五中列博山崇牙十有六縣以紅絨組簋  
跌青龍籍地以綠油臥梯二加兩跗焉筍兩端金螭首



銜鑰石壁翬五色銷金流蘇條以紅絨維之鐵杵者四所以備欹側在太室以礙地甃因易以石麟簾額識以金飾篆字擊鐘者以茱萸木爲之合竹爲柄凡鐘未奏覆以黃羅雨覆以油絹磬亦然元初鐘用宋金舊器其識曰大晟大和景定者是也後增製兼用之

石部

編磬一簾磬十有六石爲之縣以紅絨紉簾跗狻猊拊磬者以牛角爲之餘筍簾崇牙樹羽壁翬流蘇之制並與鐘同元初磬亦用宋金舊器至元中始采泗濱靈壁石爲之

絲部

琴十一絃三絃五絃七絃九絃者各二斲桐爲面梓爲底冰絃木軫漆質金徽長三尺九寸首闊五寸二分通足中高二寸七分旁各高二寸尾闊四寸一分通足中高二寸旁各高一寸五分俱以黃綺夾囊貯之琴卓髹以綠

琴四其制底面皆用梓木面施采色兩端繪錦長七尺首闊尺有一寸九分通足中高四寸旁各高三寸尾闊尺有一寸七分通足中高五寸旁各高三寸五分朱絲爲絃凡二十有五各設柱兩頭有孔疏通相連以黃綺

夾囊貯之架四髹以綠金飾鳳首八

竹部

簫二編竹爲之每架十有六管闊尺有六分黑槍金鸞鳳爲飾鑰石釘鉸以黃絨紉維於人項左右復垂紅絨條結架以木爲之高尺有二寸亦號排簫韜以黃囊

笛一斷竹爲之長尺有四寸七孔亦號長笛纏以朱絲垂以紅絨條結韜以黃囊

簫二制如笛三孔纏以朱絲垂以紅絨條結韜以黃囊  
篪二髹色如桐葉七孔纏以朱絲垂以紅絨條結韜以黃囊

匏部

巢笙四和笙四七星匏一九曜匏一閏餘匏一皆以斑竹爲之立髹底置管匏中施簧管端參差如鳥翼大者曰巢笙次曰和笙管皆十九簧如之十三簧者曰閏餘匏九簧者曰九曜匏七簧者曰七星匏皆韜以黃囊

土部

塤二陶土爲之圍五寸半長三寸四分形如稱錘六孔上一前二後三韜以黃囊

革部

搏拊二制如鼓而小中實以糠外髹以朱繪以綠雲繫

以青絨條兩手用之或搏或拊以節登歌之樂

木部

祝一以桐木爲之狀如方桶繪山於上髹以粉旁爲圓孔納椎於中椎以杞木爲之撞之以作樂

敵一製以桐木狀如伏虎彩繪爲飾背有二十七鉏鋸刻下承以槃用竹長二尺四寸破爲十莖其名曰籥櫟其背以止樂

宮縣樂器

金部

鋪鐘十有二簏簏一鐘制視編鐘而大依十二辰位特

縣之亦號辰鐘筍簾朱髹塗金彩繪飛龍跗東青龍西  
白虎南赤豸北玄麟素羅五色流蘇餘制並與編鐘同  
編鐘十有二簾簾十有六鐘制見登歌

此下樂器制與登歌同者皆不

載重

石部

編磬十有六簾簾十有二磬制見登歌筍簾與鑄鐘同

絲部

琴二十有七二絃者三三絃五絃七絃九絃者各六瑟  
十有二

竹部

簫十簫十篴十笛十

匏部

巢笙十

竽十竹爲之與巢笙皆十九簧惟指法各異

七星匏一九曜匏一閏餘匏一

土部

塤八

革部

晉鼓一長六尺六寸面徑四尺圍丈有二尺穹隆者居鼓面三之一穹徑六尺六寸三分寸之一面繪雲龍爲

飾其臯陶以朱髹之下承以彩繪跣座并鼓高丈餘在郊祀者鞞以馬革

樹鼓四每樹三鼓其制高六尺六寸中植以柱曰建鼓柱末爲翔鷺下施小圓輪又爲重斗方蓋並繚以彩繪四角有竿各垂壁翬流蘇下以青狻猊四爲跣建旁挾二小鼓曰鞞曰應樹樂縣之四隅踏床鼓桴並髹以朱雷鼓二制如鼓而小鞞以馬革持其柄播之旁耳自擊郊祀用之

雷鼗二亦以馬革鞞之爲大小鼓三交午貫之以柄郊祀用之



路鼓二制如雷鼓惟非馬革祀宗廟用之

路鼗二其制爲大小二鼓午貫之旁各有耳以柄搖之耳往還自擊不以馬革祀宗廟用之

木部

祝一敵一

節樂之器

麾一製以絳繒長七尺畫升龍於上以塗金龍首朱杠縣之樂長執之舉以作樂偃以止樂

照燭二以長竿置絳羅籠於其末然燭於中夜暗麾遠難辨樂正執之舉以作樂偃以止樂

文舞器

纛二制若旌幢高七尺杠首刻象牛首下施朱繪蓋爲三重以導文舞

籥六十有四木爲之象籥之制舞人所執

翟六十有四木柄端刻龍首飾以雉羽綴以流蘇舞人所執

武舞器

旌二制如纛杠首栖以鳳以導武舞

干六十有四木爲之加以彩繪舞人所執

戚六十有四制若劔然舞人所執

禮記注戚斧也今制與古異

金鐔二範銅爲之中虛鼻象後狻木方跌二人舉鐔築於跌上

金鉦二制如銅槃縣而擊之以節樂

金鐃二制如火斗有柄以銅爲匡疏其上如鈴中有丸執其柄而搖之其聲鐃鐃然用以止鼓

單鐸雙鐸各二制如小鐘上有柄以金爲舌用以振武舞兩鐸通一柄者號曰雙鐸

雅鼓二制如漆筩輓以羊革旁有兩紐工人持之築地以節舞

相鼓二制如搏拊以韋爲表實之以糠拊其兩端以相

樂舞節

兆鼓鼓二

舞表

表四木杆鑿方石樹之用以識舞人之兆綴

元史卷六十八